

A1^r

Sehr luftige neue Tragedy
Von der groffen vnaußsprech
lichen Liebe/ zweyer Menfchen Py=
ramus vnnd Thysbes/ Auch von dem kläglichen
vnd jämmerlichen außgang derfelbigen/ zu
genommen auß dem Poeten Ouidio/
mensweiß in ein Spiel verfaßt/ vn̄ m.
zum dritten mahl vberfehen
vnd befchrieben

Durch
Samuel Jfrael von Straßburg/ Da=
mahlen zu Münfter in S. Gregorij Thal.

Erhalten dafelbft zu Münfter/
den 19. Augufti 1604.

Getruckt zu Bafel bey Johann
Schröter/ 1616.

A2^r

Den Ehrenvesten/ Hoch-
 achtbaren vnd Fürnemmen Her-
 ren / Ambrosio Dieffenbach/ Johanni
 Rudolff Kleinen / vnd Thome Bötcheln / Bur-
 gern in Reichenweiler / ꝛc. Meinen inson-
 ders Günstigen Herren / Lieben
 vnd guten Freunden.

EHrenveste/ Hochachtbare /
 vnd fürneme Insonders Großgünsti-
 ge Liebe Herren vnd Freund: Wiewol
 diese Materia für kein Hiftori oder Gefchicht /
 fonder viel mehr für ein Gedicht vnd Fabel
 gehalten wirdt / Jedoch so muß einer der solche
 mit fleiß gelesen/ bekennen das sie (aufferhalb
 dem zusatz) einer Hiftori viel ehlicher/ dann
 einer Fabel. Dann sie fonderlich deß Poe-
 ten Ovidii schönften Materien eine ist / die nit
 allein lieblich zu lesen / fonder auch wann
 mans betrachtet / etlicher maffen lehrhaftt ist:
 Als das sich junge/ wilde vnd in vnordenlicher
 Lieb eroffne Leut darinnen erpieglen/ was sol-
 che Lieb für ein end vnd belohnung mit sich
 bringe/ namlich/ betrübnuß der Eltern vnd
 Vorgefetzten/ Schaden vnd Nachtheil an jrem
 eygenen Leib / Leichtfertigkeit in worten vnd ge-

A2^v

DEDICATIO.

berden/ vnd endtlichen beydes zeitlichen/ vnnd
wo nicht Buß gefchicht/ewigen Todt.

Diweil ich dann zu der zeit/ als ich noch zu
Lohr in Breißgaw / im Organiften vnd Provi-
forat dienft gewefen/ recreationis caufa, Ovidij
Metamorphofin für mich genomen vnd durch-
lefen/ hat mich vor andern diefe materi/ De Py-
rami & Thysbes amoribus, fo fehr (wegen der
fchönen invention) bewegt/ das ich mir als bald
fürgenommen / diefelbe in ein Tragœdiam zu-
zwingen/ bevorab weil ich noch nie gehört vnnd
gesehen/ das fie Spiels weiß wer difcribirt vnnd
befchrieben worden.

Vnangesehen aber ich fie in Anno 1601.

aufflegen vnnd trucken laffen / Jedoch weil die
Exemplaria ftarck abgangen vnd gleichfam ver-
fchwunden / Auch daher etliche zum offterma-
len an mich gefetzt/ diefelbige wider auffs new
auffzulegen: Vorab weil fie Anno 1604. den
19. Augufti von einer Ehrfamen Burgerfchafft
zu Münfter in S. Gregorii Thal öffentlich a-
girt vnd gefpielt worden: Also hab ich nit vn-
derlaßen wóllen / diefelbe auffs new zu vberfe-
hen/ vnd nachgehends auffzulegen: Jedoch mit
difem beding/ das ich / weil fie etwas Weltlich
(vnd es jetzmalen meines beruffs nit mehr ift/
mit folchen exercitijs vmb zugehn) Niemand er-
fey Jung oder Alt / hierdurch will geãrgert ha-
ben.

Diweil dann großgünftige Herren/ liebe
vnd gute Freund mir wol zu wiffen / das jhr fon-
derli-

A3^r

DEDICATIO.

derliche Liebhaber der Tragœdien feyt/ den fel-
ben nit allein mit zuſchawen gern beywohnet/
fondern auch leſet / So will ich ſie als ein ge-
ringes vñ ſchlechtes Werck euch hiemit ſampt-
lichen dediciert vnd verehrt haben: Mit dienſt-
lichem bitten / Jhr wöllet dieſelbe von mir groß-
günftig annemmen/ vnd wider die Momos vnd
Zoilos helfen defendiren vñnd verthâdigen.
Hie mit die Herren ſamptlich in den ſchutz vnd
ſchirm deß Allmächtigen befehlend. Geben zu
Münſter inn S. Gregorij Thal den letſten Se-
ptembris Anno 1609.

Der Herren

Dienſtwilliger

Samuel Jſrael.

A ij

A3^v

An den Lefer.

DEr verftändige Lefer wird dē
zufatz/ Als/ was die Warfa-
ger / Jäger / Soldaten vnnd
anders mehr anlangt / nit vbel auß-
legen / fonder fich felbs wiffen be-
scheids zuerholen/ was zu befchrei-
bung folcher fachē/ vmb beffers ver-
ftands vnd anfehens willen / requi-
riert vnd erfordert werde. Leb wol
vnd erluftig dich mit.

Author

A4^r

Ad Momos.

MOMI vñ Schnarcher auch mit hauffen
Werde bald diefem Spiel zulauffen/
Sonderlich kenne ich fchon drey
Die werden ohne allen fchew /
Verlachen diefes mein Gedicht
Fürwar fie könnens felber nicht/
Doch wann fie beffers können machen/
Laß ich mich billich hie verlachen/
Derhalb gib ich jhn diefen raht
Das fie an einem Abend fpat/
Wann d Fledermeuß feind auffgeftigen
Mit jhnen luftig vmbher fliegen/
So will ich nur mein Haupt bedecken
Das mich ihr gifft nicht mög beflecken/
Bißweylen lan fie einen fchrey
Tragen ab jederman ein fchew/
Derhalben wer andre veracht
Vnd jederzeit nach fchaden tracht/
Der ift felber verachtens werth
Solchs hat mich das fprichwort gelehrt.
Doch gfalt mir wann fie es verdreußt
Dann einr ihm felbs ein boffen reißt/
Vnd will michs gar nicht jrren lahn
Was die Schnarcher fangen an.

A iij

A4^v

Personen dieses Spiels.

Herold.

Venus die Göttin der Lieb.

Cupido ihr Kind.

Pyramus eines Grafen Sohn.

Florentinus Pyrami vertrauter Freund.

Thisbe des Königs Tochter.

Rufina ihr Jungfrau Gespiel.

Ninus der König.

Semiramis die Königin.

Simeon

Eubulus

Philomates

Sempronius.

} Rathsherren.

Thrax

Memphitis

Lifcus

Labienus

Gnato

Griffo

} Warfager.

Thrafo der Wachtmeister.

Soldaten.

Thyraus der Jäger.

Diana die Göttin des gejagts.

Bawren zum gejag gehödig.

Syrus des Jägers Knecht.

Des Königs Gefind.

Sathan.

Befchluß.

Herold.

A5^r

Herold.

EDel/ Ehrnveft vnd Achtbar Herrn
Die zu vns kommen nah vnd fern/
Auch Ehrn vnd Tugentreiche Frawen/
Jungfrawen/ vnd all die jr ſchawen/
Demnach wir heut gantz wolbedacht/
Auff diß Spielhauß her gebracht/
Ein klägliche Tragediam
Die vns fürwar gantz wunderfam
Ouidius der alt Poet
In feinem Büch beſchreiben thet.
Wiewol ſie aber für ein gdicht
Gehalten wird/ vnd kein Gefchicht:
Jedoch ſo laßt ſie ſich anfehn
Als wanns warhafftig wer geſchehen.
Was aber hie iſt der Jnnhalt
Das will ich euch erzehlen bald.
Dem mehrertheil iſt ſie bekant/
Dieweil man ſie auch hie zu Land/
Zu ſingen pflegt im Lied mit fleiß
Vnd wird genant die Tageweiß/
Von eines Königs Tochter ſchon
Deßgleichen eines Grafen Sohn/
Wie dieſe 3wo Perſonen beyd/
Geriethen in groß Hertzenleyd/
Nemlich durch Lieb die heimlich war
Keins machts dem andern offenbar/

A v

A5^v

Endtlich fo kam dahin die fach
 Zufammen zkommen war jhn gach:
 Gaben einander folchen bfcheid
 Das fie wolten hin alle beyd/
 Zu einem Brunn nah bey dem Wald
 Am morgen früh zukommen bald/
 Dafelbft jhrer Eltern ohne wiffen
 Der Liebe brunft gar außzugieffen/
 Vnd welches ehe wer bey dem Brunn
 Das folt deß andern warten thun.
 Es gſchach das Thysbe ehe da war
 Dardurch fie kam in groß gefahr/
 Dann vnverfehens ein Löwin groß
 Lieff auß dem Wald in folcher maß
 Das Thysbe jhren Rock da ließ
 Welchen die Löwin gar zerriß/
 Thysbe die lieff in fchneller eyl
 In Wald/ verbarg fich da ein weil:
 Hie zwifchen Pyramus auch kam
 Geritten/ ihn gar wunder nam/
 Wo diefes Kleyd fey kommen her
 Dann er fah das es Thysbes wer/
 Hub an ein folchen Jamer führen/
 Er könn jetzund nit anders fpüren/
 Dann das die Thier dem Edlen Weib
 Zerriffen haben jhren Leib/
 zog auß fein Schwerd in folchem fchmertz
 Vnd ftach es felber durch fein Hertz.
 Nicht lang hernach in folchem fchreck
 Sicht Thysbe ob die Löwin wegt/
 Find Pyramum jhrn liebften gut
 Todt ligen in feim eignen Blut/

Was

A6^r

Was für ein große trawrigkeit
 Vnd vnaußsprechlich hertzenleid/
 Sie da bekam/ kan wol ermessen
 Jemand so ift mit Lieb befeffen/
 Dann fie nam auß feim Leib das Schwert
 Erftach fich auch in Lieb bethört/
 Dardurch entftund ein groffes leyd
 Wegen der jungen Menfchen beyd/
 Der Jäger bald mit feinen Hunden
 Hat fie hernach im Wald gefunden/
 Zeigt folches ihren Eltern an
 Darauß groß trawren thet entftahn/
 Nun fchweiget ftill vnd feit zu ruh/
 Vnd höret der Tragedi zu
 Wie fich all fach verlauffen thu.

Argument oder Jnnhalt deß
 erften Actus.

JM erften Act gantz zorniglich
 Venus allhie erzeiget fich/
 Laufft vmb/ tregt ein brennendes Hertz
 Tracht wie fie mög anrichten fchmertz/
 Zeigt an was fey jhr finn vnd gmüht
 Wie es auß allen kräfte wüt/
 Cupidinem fie ftiffet an
 Das er jhr wöll hierinn beyftahn/
 Darmit fie bringen mög in leyd
 Den Pyramum vnd Thysben beyd/
 Cupido gar gehorfamlich/
 Zu diefem Werck laßt brauchen fich.

Dann

A6^v

Dann alsbald Pyramus her geht
 Cupido klein sich vndersteht/
 Zu schieffen in sein Hertz ein pfeil
 Laufft bald daruon in schneller eyl.
 Auff dieses Pyramus sich beklagt
 Nach allem zufall gar nichts fragt:
 Sondern tracht itäts wie er doch möcht
 Der Thysbes Lieb genieffen recht/
 Wie er jhr folchs woll machen kundt
 Derhalben er gleich zu der stundt/
 Erwöhlt jhm Florentinum bald/
 Der sich gar freundlich zu jhm halt/
 Verpricht jhm alles guts zu leiften
 In diefer sache allermeiften/
 Dauon weiter im andern Act
 Hernach foll werden angefagt.

Actus j. Scena j.

Venus/ Cupido.

Niemand darff sich verwundern drab/
 Was ich allhie zufchaffen hab/
 Das ich tritt erftlich auff den Plan
 Vnd folchs keim Weib wol ftehet an/
 Doch solt jhr wiffen was ich thu/
 Bey mir ift weder raft noch rhu/
 Vor groffer hitz lauff ich gefchwind
 Wie auch Cupido hie mein Kind/
 Wie folchs zeigt an mein brennend Hertz
 Darauß erbrent manch groffer fchmertz/
 Auch bin ich nit kommen hieher/
 Das ich erlangen wöll groß Ehr/

Sondern

A7^r

Sondern alles vnglück ftiffen an
Wie ich folchs in gewonheit han/
Groß Jamer foll entftehn noch heut
Darzu auch großes Hertzenleyd/
Zwar lieblich bin ich anzufehn/
Holdfelig/ fründlich vnd auch schön.
Aber wie groß mein macht vnd gewalt/
Das folt jhr alle fehen bald
Ein lieblich gifft trag ich bey mir
Damit ich manchen gar verführ/
Wann ich darmit berühr das Hertz
Der empfind ein lieblichen schmerz/
Doch das jhr wiffet wer ich fey
Das ich folch ding eröffne frey
Die Göttin Venus bin ich gnant/
Mein Kind führ ich bey der Hand/
Welchs wird genant Cupido blind
Hilfft mir gar hurtig vnd gefchwind.
Zwey junge Hertzen wolln wir heut
Stecken in großes Hertzenleyd/
Ja gar biß in den Todt hinein
Das foll heut vnfer Arbeit fein.
Dann Pyramus das junge Blut
Auß Grafens ftam/ eins Helden muht/
Soll jetzund hie in fchneller eyl
Verwund werden mit difem Pfeil
Soll auß Kräfte vnd all feine Sinnen
Eins Königs Tochter lieb gewinnen/
Die Thysben das holdfelig Hertz
Vnd foll gefchehen hinderwertz/
Ohn wiffen jhrer Eltern beyd
Darauß entftehen foll groß leyd.

Nun

A7^v

Nun liebes Kind hab gute acht
 Wir wolln erzeigen vnfer macht/
 Wann er tritt auff den plan herein
 Schieß jhm ein pfeil ins Hertz hinein.
 Was ich in Sinn genommen hab
 Dauon will ich nit ftehen ab/
 Gerüft bin ich vnd schon bereit
 Nun foll sich heben an der ftreit.

Actus j. Scena ii.

Pyramus.

GAr wol ift das sprichwort gemacht
 Vnd von erfahren fein erdacht/
 Nemlich die Lieb als vberwind
 Das Hertz pflegt ein zunemmen gſchwind/
 Solches erfahret jetzt mein Hertz
 Ach gar mit inniglichem ſchmert3/
 Fürwar ich fags von hertzen grund
 Bekenn es von mir selber rund/
 Das ich all Gſchafft beyd groß vnd klein
 Nicht acht/ wegen der groffen pein.
 Auch was mir fonft zuhanden ftößt
 Die groffe Lieb mich drauß erlößt/
 Ja oft pflegt es kommen dahin
 Das ich nit mehr bey finnen bin/
 Vnd geh wie ein verſcheichtes Schaff
 Verhindert mir auch meinen ſchlaff/
 Wann frölich feind die andern Leut
 Bin ich in höchter trawrigkeit/
 Ein ſolchen jnnerlichen ſchmert3
 Machftu mir Thysbe liebes Hert3/

Schlaff

A8^r

Schlaff ich/ fo fih ich dich vor mir/
 Wach ich/ fo kompft mir aber für/
 O Thysbe/ Thysbe/ könt es fein
 Das du wereft gar eygen mein/
 Vnd wereft auch nach der gebûr
 Holdfeliglich vermâhlet mir/
 Ach wie wer das ein groffe frewd
 Zwifchen vns jungen Hertzzen beyd.
 Ach wußteftu die groffe Lieb
 Die ich gegen dir ftätigs ûb/
 Ach wußteftu den groffen ſchmert3
 Darmit befeffen ift mein Hertz3/
 Ach wußteftu die groffe noht
 Die mich noch bringen wird in Todt/
 Vnd wann dein Hertz3 ſchon ſteinen wer
 So folt ich dich erbarmen fehr.
 Ich hab doch weder raft noch rhu
 Nun muß ich fleiffig fehen zu/
 Das jhr mein Lieb bald werde kundt
 O Venus bñcher ein gute ftund.
 Wann ichs nur wißt zu greiffen an
 Mit glimpff/ das jhrs werd kundt gethan/
 Vnd wem ich folt vertrauen diß
 Der es bey ihm verſchwig gewiß.
 Wann einer ſchon hat einen Freund
 Muß er ſorgen er ſey fein Feind.
 Doch will ich einen mir erwehlen
 Dem ich die ſachen thu erzehlen/
 Dann Florentinus mir allzeit
 Zu dienften willig vnd bereit/
 Eröffnen will ich jhm mein Hertz3
 Vnd anzeigen all meinen ſchmert3/

Wil

A8^v

Will auch gleich sehen wo er ist/
 Das er sich zu der fachen rüft/
 Wann ich nun wüfte wo er wer/
 Sihs da kompt er eben her.

Actus j. Scena iij.
 Florentinus/ Pyramus.

NVn geh ich vmb fchier difen Tag
 Vnd fih ob ich nit finden mag/
 Den Pyramum mein guten Freund
 Welcher ftill von mir gangen heint/
 Mich dunckt jhm fey was gelegen an
 Das er fo trawrig vmb thut gan.
 Dort geht er mit trawrigem muth
 Nit weiß ich was er dencken thut/
 Will ihm ruffen vnd zu jhm gehn
 Vnd sehen was jhm fey gefchehn.
 Hör Pyrame was gehftu vmb/
 Damit ichs feh/ bin kommen drumb.
 Pyramus.

Ach Florentine Bruder mein
 Gar billich thu ich trawrig fein/
 Mein Hert3 ift mir fürwar fo fchwer
 Das ich fchier nit kan reden mehr/
 Vnd glaub gewiß ich muß zergehn/
 Wann mir nit bald wird hilff gefchehn.
 Florentinus.

Was ift dir dann? mein fag mirs an
 Vielleicht ich dir was rahten kan/
 Jft dir vielleicht jemand geftorben?
 Odr haft vmb ein alt Weib geworben?

Odr

B1^r

Odr biftu kranck/ fo fag es mir
 Kan ich fo will ich helffen dir.

Pyramus.

Ja freylich bin ich kranck jetzund
 Vnd fchier biß auff den Todt verwundt.

Florentinus.

Wer hat dich fo befchädigt dann?
 Hat dich iemand gegriffen an?
 Fürwar wann du verwundet bift
 So laß dir helffen zu der frift/
 Dann wer folchs lang auffchiebet gar
 Der kompt bißweilen in gefahr.

Pyramus.

Hett gern das man mir helffen kündt
 Ich wolt mich darzu rüften gſchwind.
 Doch köntestu mir helffen fein
 Wann es nur auch dein Will möcht fein/
 Darumb ich dich gar feundtlich bitt
 Ach Bruder mein verfag mirs nit.

Florentinus.

Fürwar mein Bruder glaub mir das
 Wann ich dir weiß zu helffen was/
 So will ichs thun gar wol vnd frey
 Das fag ich dir bey meiner Trew/
 Es foll bey mir verſchwiegen fein
 Als wann du es anfragt eim ftein.

Pyramus.

Das bger ich nit/ dann mir ein ftein
 Hierinn kan nit verholffen fein.

Florentinus.

Das weiß ich wol/ allein fag ich
 Das es bey mir foll fein heimlich/

B

B1^v

Darumb fo sag mirs künlich an
Wer dir jrgend hat Leyds gethan.

Pyramus.

Ach lieber Freund wie ift mein Hertz
In Lieb verwundt fo tieff mit fchmert3.

Florentinus.

Ja ich hör wol/ es fällt dir do?

Pyramus.

Hab wol gedacht du kompt mir fo
Das ift die Wund dauon ich fagt
Da ich dir vor mein Leid geklagt/
Darumb fích an mein junges Blut/
Vnd hilff doch meim traurigen muht.

Florentinus.

Gegen wem bißt alfo gefint?
Vnd einmals in der Lieb entzündt?

Pyramus.

Ach fragftu lang? wer es folt fein/
Thysbe mein Hertz genommen ein/
Deß Königs Nini Tochter fchôn
Jhr Nam thut mir zu hertzen gehn.

Florentinus.

O Pyrame was denckftu doch
Dein Hertz das fteigt dir viel zu hoch/
Dann dir drauff ftünd gar groß gefahr/
Wann folches würde offenbar:
Weil fie von Königlichem Stamm
Erborn/ vnd eins ftattlichen Namm/
So bißt du eines Grafen Gfchlecht/
Wiewol hoch/ ehrlich vnd gerecht/
Derhalb fo will fichts fchicken nicht/
Das fie dein Hertz fo hoch anficht.

Pyra≠

B2^r

Pyramus.

Alfo muft mir nicht kommen her/
 Du krenckft mich je lenger je mehr/
 Sondern gib raht was ich thun foll/
 Darmit fie es erfahre wol/
 Wie ichs jhr möge machen kundt
 Das mein Hertz fey in Lieb verwundt
 Gegen jhr als der schönften Zier.
 Die jemals fey fürkommen mir
 Vnd das ich felbs gern bey ihr wer/
 Wolt jhr anzeigen mein beger.

Florentinus.

Zwar hab ich vor verheiffen dir
 Zu dienen wo nur möglich mir/
 Aber das sage ich fürwar
 Es fteht darauff gar groß gefahr.
 Doch thu ich dir in trewen fagen
 Will Leib vnd Leben mit dir wagen/
 Ja will mit dir gehn in den Todt
 Wo es erfordern wird die noht.

Pyramus.

So wolln wirs alfo greiffen an
 Du muft hiemit felbs zu jhr gan/
 Mein anligen erzehlen fein
 Doch alles ftill vnd in geheim/
 Darumb nimb war der gelegenheit
 Das jhr allein feit alle beyd/
 Vnd fprich ob es nit könt gefein/
 Ich wolt ein wort zu jhr hinein/
 Allda anbringen eine fach
 Gar heimlich in jhrem Gmach/
 Wann es aber nit kan gefchehn/

B ij

B2^v

Sol sie doch nur ans Fenster stehn:
 Da will ich dann reden mit jhr
 In aller zucht vnd in gebür/
 Doch soll sie sagen auch darneben
 Was für ein warzeichen sie wöll geben/
 Das ich weiß wann ich soll gehn
 Vnd wann sie wöll ans Fenster stehn.
 Ach lieber Bruder richt es fein auß
 Wann etwas wird werden darauß
 Fürwar das sag ich dir hiemit
 Gold vnd Gelt fol dir manglen nit.
 Florentinus.

Wolan so will ich gehen dar
 Vnd der gelegenheit nemmen war/
 Laß dirs nicht angelegen fein
 Ich will es wol außrichten fein.
 Nun wollen wir hinein gehn beyd
 Zum essen/ dann es ist bereit.
 Vielleicht so ist der König gheffen
 Das er das Morgenmal woll essen/
 So müffen wir beyd drinnen fein
 Vnd dem König auffwarten fein.
 Mufica.

 Argument oder Jnnhalt deß
 andern Actus.

JM andern Actu triumphiert
 Venus das sie schon hatt verführt/
 Den Pyramum das junge Blut/
 Genommen eyn fein Hertz vnd Muht/
 Verpricht ferner grimmiger weiß

3u wen=

B3^r

Zu wenden an gar guten fleiß/
 Die Thysben zu verführen auch
 Das sey ihr arbeit vnd gebrauch:
 Welches also bald ift gefchehn
 Das sie verwund herauß thut gehn/
 In dem kompt Florentinus her
 Zeigt jhr an Pyrami beger/
 Zwar ftelt sie sich als vnbekannt
 Endtlich sie doch jhr Red vmbwand/
 Vnd schüttet vor jhm auß jhr Hertz
 Klagt jhm auch jhren groffen schmerz/
 Die groffe Lieb so sie heimlich
 Gegn jhm getragen innerlich:
 Sprach gleich was Pyramo gebrift
 Dasselb jhr auch im Hertzen ift/
 Auch Florentinus alls hie that
 Was eim getrewen Freund anftaht/
 Frage ob es doch nit köndt gefein/
 Das Pyramus kãm zu jhr hineyn/
 Welchs sie jhm alsbald abgefchlagen
 Ein ander mittel angetragen/
 Wie sie nemlich am Abend gar/
 Darmit es niemand nemme war
 Woll ein Lucern vnd Liecht zugleich/
 Fürs fenster hencken zum warzeich/
 So soll er achtung geben schon
 Zu jhr alsdann ans fenster fton/
 Reden mit jhr in Zucht vnd Ehr/
 Sein anligen vnd fein beger:
 Da sie einander gaben bfcheid
 Wie sie möchten zufammen beyd/
 Namlich am morgen früh alsbald

B3^v

Hierauß zum Brunnen in den Wald/
 Welchs jhnen worden faur vnd ſchwer
 Wie jhr hernach werd hören mehr/
 Drumb ſchweiget ftill/ vnd fehet zu
 Was Venus hie verrichten thu.

Actus ij. Scena j.
 Venus/ Cupido.

EJn ſchlacht han wir gewonnen ſchon/
 Cupido du mein lieber Sohn/
 Dann Pyramus ift ſchon verwundt
 Biß auff den Todt zu diefer ftund/
 Alfo muß man mir geben platz
 Wann einer ihm erwöhlt ein ſchatz/
 Gefchwind kan ich helffen darzu
 Das er hat weder raft noch rhu/
 Nun müffen wir noch weiter dran/
 Wie wir es heut gefangen an.
 Thys be die muß an diefen Reyen/
 Will ſie mit groffem Leyd erfrewen/
 Ja ich will ſie zufammen hetzen
 Zum trübfals brunnen beyde fetzen/
 Das mein Macht werde offenbar
 Mein lieblich Gifft ſag ich fürwar:
 Alsdann foll man erfahren fein
 Was Venns für ein Weib thu fein/
 Auß zorn red ich jetzt dieſe wort/
 Jch wills bald machen auff ein ort/
 Mein Macht die will ich heut erzeigen
 Niemand foll ſich darab erfrewen/
 Mein liebes Kind ſchieß dapffer drein/

Vnd

B4^r

Vnd laß dirs angelegen fein/
 Darmit wirs bringen zu eim end
 Mach du dich nur auff behend.

Actus ij. Scena ij.
 Thysbe/ Rofina/ Florentinus.

WJe ift mir doch Rofina mein?
 Mich hat etwas genommen eyn
 Dann mir was groß gelegen an/
 Das ich es fchier nit fagen kan.

Rofina.

Wie ift euch dann mein Thysbe frumb?

Thysbe

Die Glieder mein gantz vmb vnd vmb
 Seind gantz erfchlagen fag ich dir
 Ach köndt doch jemand helffen mir.

Rofina.

Drumb zeigets an fo wolln wir fehn
 Ob euch vielleicht möcht Raht gefchehn/
 Dann man doch alle fachen hat/
 Darmit man Krancken fchaffet Raht/
 Von gebranten Waffern mancherley/
 Deßgleichen andrer fpecerey/
 Wie folchs ewer Fraw Mutter bereit
 Zu gutem jhr vnd andrer Leut.

Thysbe.

Jch weiß wol das vorhanden ift
 Was jrgends eim zur not gebrift/
 Wann man die Kranckheit zeiget an/
 So wird eim alsbald Raht gethan/
 Aber was mir jetzt wider fahrn

B4^v

Kan ich selber nicht offenbarn/
 Dann ichs fürwar selber nit weiß/
 Allein mein Leib ist voller schweiß/
 Vnd ist mir auch mein Hertz so schwer
 Vor angst vnd sorg betrübet sehr/
 Das ich nit weiß wo auß noch eyn
 Ach wer erlößt mich von der pein?

Rofina.

Ey seit getroffen/ ich bit euch drum
 Wollet doch nit lang gehen vmb/
 Ewer anligen öffnen mir/
 Darmit euch ärgers nicht berühr:
 Secht Thysbe wer kompt zu vns her/
 Als ob es Florentinus wer/
 Vielleicht wird er begern zu euch/
 Habt acht er ist schon da jetzt gleich.

Florentinus/

Gott grüß euch jhr Jungfrawen beyd/
 Thysbe.

Danck habt mein Florentine allzeit
 Wo wolt jhr hin spatzieren gan
 So gar allein ohn gleites Man.

Florentinus.

Nicht so gar weit mein Thysbe schon
 Ich hab zu euch her wollen gon/
 Wann es wer ewer gelegenheit
 Wolt ich mit euch ein kleine zeit
 Reden/ doch heimlich vnd gar still
 Dann mir daran gelegen viel.

Thysbe.

Deßhalb ich wol zu frieden bin
 Rofina geh du jetzt nur hin/

Vnd

B5^r

Vnd richte alles fleißig auß
 Was wird von nöhten fein im Hauß/
 Wann man dich fragt vnd von mir redt
 So sprich/ Jch schlaff auff meinem Betth/
 Dann ich bin gentslich nit gemeint
 Zum Nachteffen zukommen heint/
 Drumb foll man mich zu frieden lan
 Wann ich was bger wils zeigen an.

Rofina

Fleißig will ichs verrichten fein
 Jhr folt nur wol zu frieden fein.

Thisbe.

Nun find wir Florentine allein
 In allen Ehren wollen wir fein
 Besprachen vns was nöhtig ift
 Von Hertzen vnd ohn allen Lift/
 Dann mir die zeit vnd weil fo lang
 Heut diefen tag vnd war mir bang/
 Vnd weiß nit was die vrfach sey
 Das ich gedenck fo mancherley/
 Fürwar mein Lebtag weiß ich nie
 Das mir folchs begegnet ie/
 Dann all mein Glieder ftarcker weiß/
 Treiben mir auß ein kalten schweiß/
 Das Hertz war mir dermassen bſchwert
 Als ob drinn wer ein ſchneidend Schwert/
 Drumb was ihr mit mir reden wolt
 Daffelbig jetzt anbringen folt/
 Darmit vielleicht nit ohn gefehr
 Jemand zu vns komme hieher.

Florentinus.

Was ich mit euch zu reden nun

B5^v

Das will ich als bald eylend thun/
Vieleicht so wird euch fein bekandt/
Ein Graff so Pyramus genandt/
Geziert mit aller Zucht vnd Ehr
Mit guten Sitten/ guter Lehr/
Welcher der liebt an diefem ohrt
Vieleicht habt jhr darvon gehört.

Thysbe.

Von dem jhr fagt/ den kenn ich nicht
Müßt mir geben beßern bericht.

Florentinus.

Jhr dörrft euch zwar vor mir nit schewen
Dann ichs warhafftig will verſchweigen/
Vnd was ich ihm verheiffen ſchon/
Das will ich gegen euch auch thon/
Wann jhr jhn kennt so zeigets an
Darmit ich weiter ſagen kan.

Thysbe.

Zwar anderft kan ich jhn nit kennen
Dann wie ich jn hör täglich nennen/
Vnd wie er gehet auß vnd eyn/
Anderft ich nit gedencke fein/
Aber er ſey gleich wer er wöll
Erzehlts was jhr habt in befehl.

Florentinus.

Geftern kam er trawrig zu mir
Fieng an zu reden in gebür/
Ob ich jhm gleich verheiffen will
All feiner Red zu ſchweigen ftill
So woll er mir ſagen ein ſach
Die ich allein euch kundtbar mach/
Welches ich jhm verheiffen gleich

Da

B6^r

Da fieng er an gantz trawriglich/
Wie trawrig ift das Hertz in mir
Das ich nit mehr kan reden fchier/
Mir ift nit anderft dann ich foll
Zergehn wie Wax/ vnd werden doll/
Jch bin kranck vnd zu diefer ftund
Biß auff den bittern Todt verwundt/
Ach hilff mir liebfter Bruder mein/
Ach laß dirs angelegen fein/
Mit keim Eyfen bin ich verwundt
Mein Hertz ift im Leib entzündt
Gegen der allerfchönften hie
So auff die Welt ift kommen je:
Die billich foll ein Göttin fein
Hat mir mein Hertz genommen eyn.
O wie ein holdfeliges Hertz
Macht mir mein Hertz fo voller fchmertz/
Das ift die Thysbe außerkorn
Von Königlichem ftamm erborn/
Ach geh zu jhr vnd fags jhr an
Wie ich ein groß verlangen han/
Zu jhr zukommen in gebür/
Ja zu der aller fchönften Zier/
Das ich jhr klag mein groffes Leyd/
Darmit ich wider werd erfrewt/
Doch heimlich/ wanns kan müglich fein
In jhrem eygnen Gmach allein/
Kan es aber fo nit gefchehn
So foll fie an das Fenfter ftehn/
Da will ich mit jhr reden fein
Was mir thut angelegen fein/
Doch foll fie geben ein Warzeichen

Darmit

B6^v

Darmit ich k^onn die zeit erreichen:
 Vnd das ich jhr auch w^unfschen thu
 Viel gl^uck vnd groffe frewd darzu.
 Solchs bath er mich das ichs außricht/
 Ich bitt habt mirs f^ur vngut nicht
 Thysbe.

Ach Florentine ich euch bitt
 Etwas wolt mirs verfahren nit/
 Darauff fo gebt mir ewer Hand
 Zu warer trew vnd einem pfandt/
 Hiemit fo sag ich ohne schew
 Das wie jhm ist mein Hertz auch sey.
 O groffe noht/ nun lih ich schon
 Was mir heut war gelegen an/
 Was mir mein Hertz fo hefftig krenckt
 Ein junger Held wol an mich denckt.
 Nun wil ich haben auch kein ruh
 Biß das ich jhn anschawen thu/
 Aber in mein gemak kan er heut
 Nicht kommen wegen ander leut.
 Florentinus.

Wie kan man es sonft greiffen an?
 Das ichs jhm wider sagen kan/
 Thysbe.

Sagt das er geb gar fleiffig acht
 Wann her zu kompt die finfter nacht/
 Das vns niemand mag h^oren mehr
 So foll er als dann kommen her/
 Zum fenster da ich warten will
 Vnd reden mit jhm in der still.
 Vnd diß foll sein warzeichen sein
 F^urs fenster wil ich hencken fein/

Ein

B7^r

Ein Lucern mit eim hellen Liecht

Darmit er sich verirre nicht.

Saat ihm darneben alles aut

Vnd das er sey nur wol zumuht/

Biß das da kompt ein gute zeit

Vnd wir zufammen reden beyd/

Auch das er ftarck bleib in der Lieb

Die ich bey tag vnd nacht ftãts ùb/

Nun Florentine gehet hin

Vnd fagt ihm wie ich gefinnet bin.

Florentinus.

Ja ich wil gleich hin zu jhm gon/

Zu guter Nacht ich scheid daruon.

Thysbe.

Das muß doch fein ein gwaltig werck

Nun sihet man der Vene is fterck/

Nun fühlet man die ftarcken pfeil/

Darmit das Hertz in fchneller eyl/

Verwundet wird mit fchmertzzen groß

Welchs Amor macht das Kindlin bloß/

O Venus bfcher ein frõlich zeit

Vnd fchaff vns doch zufammen beyd/

Mein Hertz wird fonft in meinem Leib

Zerfchmeltzen das daran nich ts bleib/

Jch komm gewiß fonft in groffe noht

Ja das noch mehr ift/ in den Todt.

Nun will ich wider heim ietzund

Vnd warten auff die frõlich ftund.

Actus

B7^v

Actus ij. Scena iij.

Florentinus Pyramus.

Pyrame o frew dich fehr

Jch bring dir gute neue Mähr/
Nun leg von dir all trawrigkeit/
Empfach von mir viel fröligkeit/
Ein Artzt/ der dich nun mach gefund/
Hab ich gefunden zu difer ftund:
Ein Hertzlabung vorhanden ift
Deß frew dich zu diefer frift.
Thysbe die laßt dich freundlich grüffen
All Lieb vnd gute Freundſchafft wiffen.
Pyramus.

O was fagft Florentine mein
Thu ich auch noch bey Leben fein/
Oder traumbt mir an diefer ftett
Das ich nit recht hör was geredtt
Florentinus.

Ja fie wüncft dir viel guter Nacht
Dein Wort jhr Hertz han milt gemacht.
Pyramus.

Ach Florentine wie licht fie?
Florentinus.
Als wann du fie gefehen nie.
Pyramus.

Sagt fie nit das ich kommen foll/
Vnd das fie mit mir reden woll?
Florentinus.

Freylich rüft dich nur auff die fahrt/
Sie allbereit ſchon auff dich wart/
Drumb lauff man möchte fie entführen
Oder auff andre weiß verlieren.

B8^r

Pyramus.

Du kanft mich fonft verieren wol
Vnd bift bißweilen fchalckheit voll.

Florentinus.

Nun wil ich dirs in ernft anfragen/
Wie fich die fachen zugetragen/
Jch kam gleich zu jhr allein/
Nur ein Jungfraw thet bey jhr fein/
Die fchicket fie alsbald von jhr
Darmit fie mög auffhorchen mir/
Dein Auligen eröffnet ich/
Erzehlt jhr alles trawriglich/
Wie das fie hab dein junges Hertz
Genommen ein mit groffem fchmert3
Das du kein ruh habft Tag vnd Nacht
Vnd an fie denckft mit aller macht/
Vnd wann es gelegenheit mög fein
So möchftu zu jhr felbs hineyn/
Mit jhr reden in jhrem Gmach/
Jn züchten fein von aller fach/
Oder wann folchs nit kan gefchehn/
Das fie nur wöll ans Fenfter ftehn/
So wolftu mit jhr drunden reden
Was dir vnd jhr wird fein von nöhten.
Wie du kônft nit mehr leben fchier
Alfo bift du entzündt gegen jhr/
Als ich es alfo jhr erzehlt
Gefchwind fie in die red mir felt/
Vnd fprach: fürwar was jhm gebrift/
Daffelb mir auch im Hertzen ift.

Pyramus.

O Florentin du bift ein Gott

Fürwar

B8^v

Fürwar ein rechter freudenbott.

Florentinus.

Weiter sprach sie es könn nicht sein
 Das du kompt in jhr Gemach hinein/
 Dann es findt äts vmb sie viel Leut
 Sie wöll dir nennen sonst ein zeit.
 Namlich solt haben fleißig acht
 Wann schier her kompt die finfter Nacht/
 So soltu zu dem Hauß hin gehn
 Da wöll sie an das fenster stehn.
 Zum warzeichen soltu gedencken
 Wöll sie ein Liecht fürs fenster hencken/
 In ein Lucern/ das wol betracht
 Das du nit jrreft in der Nacht.

Pyramus.

Ach der frölichen Bottschafft dein
 Wie kan ich doch mehr trawtig sein/
 Wie sol ichs auch vergelten dir
 Das du also gedienet mir/
 Mein tag will ich dir guts beweifen
 Zu dienen dir mich äts befleißigen.
 Vnd wann ich schon mein Leib vnd Leben
 Solt für dich in den Todt dargeben/
 So wolt ich mich doch gar nit sparen
 Das soltetu für war erfahren.

Florentinus.

Jch wünsch das es bedörffe nit/
 O Pyrame sey nur zu fried/
 Nun wollen wir hineyn gehn beyd
 Dann es fürwar ist groffe zeit.

Actus

C1^r

Actus ij. Scena iij.

Thysbe.

WJe Pyramo verheiffung gelchehn/
 Alfo will ichs verrichten gehn/

Rofina bring ein Liecht herfür

Vnd ein Lucern hieher zu mir/

So will ichs für jens Fenfter hencken

Das er sich wiß darnach zu lencken/

Hie will ich nur gewertig fein

Ja deß Hertz allerliebften mein/

Ach wer die ftund vorhanden fchon/

Das ich jhn fehe drunden ftohn.

Er kompt noch nit das merck ich wol

Ach wie ift mir mein Hertz fo voll.

Ach Pyrame biß noch nicht hie?

Jch glaub ich werd dich fehen nie.

Actus ij. Scena v.

Pyramus/ Thysbe.

ES dunckt mich fchier es fey nun zeit

Das ich mich zu der fach bereit/

Dieweil es ift nun zimlich fpat

Vnd niemand auff der gaffen gaht/

Fürwar dort fch ich fchon von fern

Hangen ein Liecht in der Lucern.

O helffet mir jhr Götter all

Vnd ftehet mir bey allzumal.

Mein Hertz laufft vmb in meinem Leib

Gleichfam als wanns ein Rad vmbtreib.

Nun will ich gehen baß herbey

C1^v

Vnd fehen wo die Liebste fey.

Thisbe/ Thisbe/ ach höret mich

Ach fecht herauß dann hie bin ich/

Thisbe/ Thisbe/ ach liebes Hertz

Treibt mit mir Armen keinen fchertz.

Thisbe.

Wer ift drunden der also fchreyt?

Pyramus.

Ewer Pyramus ifts all bereit.

Ein guten Abend Thisbe mein

Wie könnet jhr fo hart doch fein?

Thisbe.

Habt danck o liebfter Pyrame

Auff euch hab ich gewartet ehe/

Hab auch bey mir gantzlich vermeint

Jhr werd vielleicht außbleiben heint.

Pyramus.

Ach nein/ wie köndt ich dieses thun

Das ich ein folchs folt vnderlon/

Solt ich die Liebste befuchen nicht

Die mir mein Hertz fo hoch anficht/

Ach Thisbe wie ifts gangen zu

Das ich euch fo fehr lieben thu?

Woher kompt doch die groffe Lieb

Die ich bey Tag vnd Nacht ftåts üb/

Woher entfpringt das ftarcke Fewr

Ach die füffen Gedancken thewr?

Ach heißt dann dieses nit geliebt

Wann einem fo fein Hertz betrübt?

Ach habt mirs doch für vbel nit/

Das ich vor euch mein Hertz außfchütt.

Thisbe.

C2^r

Thysbe.

Ach Pyrame w3 darffs der sag
 Solt ich erft fahen an ein klag?
 Allein sag ich ohn allen lift/
 Mein Lieb dann ewere gröffer ift/
 Gegen euch als ein Jüngling fchon
 Ach laft es euch zu Hertzen gohn/
 Mein hertz wird fonft noch mehr gekrenckt
 Wann jhr weniger an mich denckt.

Pyramus.

Ach köndt ich ewern Leib vmbfangen/

Thysbe.

Ach könt ich euch zu mir her langen.

Pyramus.

O liebe Thysbe könte ich
 In Taubens gftalt verwandlen mich/
 Wolt ich von gantzem Hertzen mein/
 Fliegen der Lieb zum Fenfter hineyn/
 Die fchönften äuglin fchawen an/
 So mich hierzu beweget han:
 Ach wie wolt ich in Ehr vnd Züchten
 Mein Lieb in ewer Lieb verpflichten/
 Sagt Thysbe kan es doch nit fein
 Das ich zu euch möcht kommen eyn?

Thysbe.

Es fteht darauff groß forg fürwar
 Dann euch vielleicht der Wächter fchar/
 Erfehen möcht vnd greiffen an
 Darauß groß vnglück köndt entftan/
 Ein andern ohrt müffen wir wehlen
 Vnfer anligen zu erzehlen.

C2^v

Pyramus.

So wolt ich euch bald sagen fein/
 Was da were die meinung mein/
 Wo wir zusammen kämen hin
 Erft falt es mir in meinen Sinn/
 Hinauß wol in den grünen Wald/
 Dafelbften ift ein Brunnen kalt/
 Welcher euch wol wird fein bewuft
 Jft auch ewers Herr Vatters luft/
 Dahin er zu fpacieren pflegt
 Wann jhn groß traurigkeit bewegt:
 Dafelbft könten wir fein allein
 Jedoch in aller Zucht ich mein/
 So müft jhr fehen allbereit
 Wie jhr fucht ein gelegenheit/
 Das jhr kämen auß ewerm Hauß
 Wol an gemelten ort hinauß.

Thisbe.

So wil ich auch für mein Perfon
 In keinen weg diß vnderlon/
 Sonder ich wil mich vnderftehn
 Am morgen früh binauß zu gehn/
 Dann die Wächter die gantze Nacht/
 Sauffen fich voll mit aller macht/
 Vnd wann es morgens fchier wird Tag/
 Vnd keiner nit mehr wachen mag/
 So fahen fie dann schlaffen an
 Achten nit wer hinauß thut gahn/
 Diß wil ich alfo nemmen war
 Das es gefchehe ohn gefahr/
 Aber noch eins muß fein verricht/
 Darmit wir irgent jrren nicht/

Nemlich

C3^r

Nemlich welchs erftlich da wird fein
 Das foll deß andern warten fein/
 Biß das wir zſammen kommen beyd
 Zu heben an die groffe frewd.

Pyramus.

Wolan ich wil mich auch bereiten
 Am morgen früh hinauß zureiten/
 Niemand wil ich nemmen mit mir
 So darff ich nit forgen darfür/
 Das es möcht werden offenbar
 Vnd bleibt alfo ohn einig gefahr/
 Nun muß ich wider von euch ſcheiden
 Erft hebt recht an ein groffes leiden/
 Darmit jhr gehen könt zu rhu
 Ich halt das ich euch hindern thu:
 Ach lieber Schatz zu guter Nacht/
 Ach weh mein Hertz im Leib mir kracht.
 O Amor wo bißt her entſprungen
 Das du mir fo ins Hertz gedrungen/
 Muß ich fo trawrig ſcheiden hin
 Bey dem ich nit gnug gewefen bin/
 Muß ich wider von dannen kehren/
 Mein Leben in trübfal verzehren/
 Muß ich mich treffen lan fo gwiß/
 Mit den Pfeilen Cupidinis/
 Ach Thysbe ich gefegne euch
 O Edle Kron gantz tugendreich.

Thysbe.

O wolt jhr ſcheiden wie jhr ſagt
 So feys der gantzen Welt geklagt/
 Ach Pyrame zu guter Nacht
 Ich bitt das jhr mein Lieb betracht.

C3^v

Pyramus.

So habt mein Trew zu einem pfandt
Die wolt euch machen baß bekandt.

Thisbe.

Denckt jhr an mich/ wie ich an euch
So wird gar groß die Lieb zugleich.

Pyramus.

Zu guter Nacht will ich euch schencken
Ein Lied darbey jhr mein Holt dencken/
Heimlich will ich es fingen euch/
Auff feyten spielen auch zugleich.

Ein schön Lied von dem Vr-
theil Paridis.

Lieb kan alls vberwinden/ Thut weit für
Dann kein Mañ ift zu findē/ der jhr kann

Reichthumb gahn :|:

wi der ftahn :|: Dann der Paris

allein/ kan ein Exempel fein.

2.

Dann als er lag im schatten/ in Mefug dem
Wald/ drey Göttin zu jhm traten/ baten jhn
gleicher

C4^r

gleicher gefalt. Er folt nach jhrem beger/ fagen
welchs die fchönfte wer.

3.

Dann welche wirdt erlangen/ der fchönheit
preiß vnd ehr/ die folt alsbald empfangen/ von
Gold ein Apffel fchwer. Darauff lich jede
bhend/ heimlichen zu jhm wend.

4.

Die erft wolt jhm zuftellen/ weißheit vnnd
groffe Kunft/ wann er nur wurde fellen/ dz Vr-
theil jhr zu gunft/ die ander verhieß jhm bald/
Reichthumb vnd groffen Gwalt.

5.

Die dritt die fprach ob allen/ wann der Apf-
fel mein foll fein/ fo foll nach deinem gefallen/ das
fchönft Jungfrewelein/ Dir werden zugefelt/
drauff er das Vrtheil felt.

6.

Vnd gab den preiß der dritten/ dz macht der
Liebe brunft/ die fein Hertz hat durchfchnitten/
für Reichthumb/ Witz vnnd Kunft. Drauß
muß man fehn gefchwind/ wie die Lieb als über-
windt.

ENDE.

Thysbe.

O Pyrame ich glaub fürwar
Mein Hertz wöll auß meim Leibe gar/

C iij

C4^v

O der Hertzlichen Lieblichkeit/

O wer ich nur todt allbereit.

Pyramus.

Thisbe nun will ich gehen fort

Lieber gedenckt an meine Wort/

So will ich ruhen auch ein weil

Mit mir trag ich die Liebes pfeil/

Viel guter Nacht die wüñfch ich euch

Thisbe.

Viel taufent wüñfch ich euch

Mufica.

Argument oder inhalt deß
dritten Actus.

JM dritten Act wird man jetzt fehn

Wie Ninus thut herauffen gehn/

Gantz trawrig vnd mit großer klag/

Gibt er fein gehabtten Traum an Tag:

Befchickt derhalb auß manchem Land

Die Warfager her allefant/

Die jhm folten geben bericht

Des Traums der jhn fo hoch anficht/

Aber vergebens war die fach

Dann manche deutung da gefchach.

Derhalben gdacht er allefant

3u tödten fie in feinem Land/

Da baten fie noch vmb ein frift

3u brauchen einen andern lift/

Steckten fich in ein Circkel eyn/

Befchwu

C5^r

Boschwuren die Geiffter in gemein/
Welche Kunft auch nit gut gethon
Empfiengen famptlich jhren lohn/
Wie jhr werd fehen in gemein/
Wann man rühig vnd ftill wird fein.

Actus iij. Scena j.
Ninus/ Semiramis.

WJe foll ich doch von Leyden fagen?
Wem foll ich meinen zuftand klagen?
Semiramis.

Wie fo/ was ift euch dann gefchehn?
Ninus.

Jch forg es werd vnglück entftehn/
O weh wie ift mir alten Mann/
Ach/ ach was foll ich fangen an?
Semiramis.

Ach fagt mein liebftes Ehegemahl
Was habt jhr doch für ein zufall?
Ninus.

O laß mich gehn mach nit viel wort
Semiramis.

Habt jhr verwürcket dann ein mordt?
Sagt mirs doch ich bitt euch durch Gott
Eröffnet mir all ewer noht.

Ninus.

Wann ich dich fchon deß lang bericht/
So kanftu mir doch helffen nicht/
Wann mirs nit andre zeigen an
Die mehr dann du erfahren han/
Dann ich gar ein fhrecklichen Traum

C v

C5^v

Gehabt/ ich kan es fagen kaum/
 Mein Lebtag kam mir folchs nit für
 Nit weiß ich was bedeutet mir/
 Mir traumet wie wir alle beyd
 Saffen auff einer grünen Heyd/
 Welche geziert mit Blümlein frey
 Vnd Rößlein gar mancherley/
 Da faffen ich vnd du allein
 Mitten vnder den Blümelein/
 Vnd redten da von lachen viel
 Die vns betreffen an dem ziel/
 Da fiengst du eins mals schreyen an
 Als hett man dir groß Leid gethan/
 Sihe da fahe ich geschwind
 Das du gebareft gleich zwey Kind/
 Auff einmal wie ich dir hie sag
 Darzu mit jämlicher klag.

Semtramis.

O Jupiter was Traum ist das?

Ninus.

Hör zu es ist noch geschehen was:
 Wir namen bald die Kinder beyd
 Legten sie zu vns auff die Heyd/
 Vnd hatten große frewd darab
 Als ich kaum je gefehen hab/
 Bald ich vnd du da schliefen eyn
 Thaten ohn alle sorgen fein/
 Sihe da kam daher gelauffen
 Ein Hirsch in feiner brunft vnd schnauffen/
 Nam vnuerfehens vnd geschwind
 Auff sein Gehörn die beyde Kind/
 Leff gar schnell weg von difem ohrt/

Semi=

C6^r

Semiramis.

O der rrbärmlichen wort.

Ninus.

In wilden Wald trug er sie beyd

Vnd würcket noch ein groffes leyd/

Als sie da lagen auff feim Ghurn/

Hört man ein klågliche gschrey sie fûhrn/

Nach folcher jâmerlichen noht/

Fand man sie beyde ligen todt:

Vnd faht man gar eygentlich

Wie sie der Hirsch | so graufamlich/

Mit feinem Ghurn hatte verletzt

Jhr junge Hertzen auffgeschlitzt.

Was mir nun diefer Traum bedeut

Das wil ich kurtzumb wiffen heut.

Hab außgeschrieben in alle Land

Beydes bekandt vnd vnbekandt/

Die Warfager zu fordern ich

Das sie doch wol berichten mich/

Was diefer Traum bedeute mir

Jch meint sie solten kommen schier

Semiramis.

Nun wollen wir gehen hinein

Vnd jhrer zukunfft gwertig fein/

Vnd laft es euch nit ligen an

Er wird ein gut bedeutung han.

Actus iij. Scena ij.

Simeon/ Eubulus/ Philomates/

Sempronius.

EIn guten Tag jhr Herren fron/

Eubulus.

C6^v

Eubulus.

Habt danck mein lieber Simeon.

Simeon.

Wo wolt ihr hin so früh all drey/

Jch glaub das etwas gŕchehen fey.

Eubulus.

Mich wundert fehr warumb man heut

Vns laft beruffen auff die zeit/

Vnd was der K nig vnfer beger

Als wann es hoch von n hten wer.

Philomates.

Vielleicht so wird er halten Gricht/

Jch k nt fonft anderft wiffen nicht.

Sempronius.

Mich dunckt es werden jhm noch heut

Zu Hau  kommen viel frembder Leut.

Simeon.

Zwar hab ich geftern auch vernommen

Das jhm viel Volck noch heut foll kommen/

Dann er die Botten au gefandt

Gefchicket in gar frembde Land/

Das fie gar viel beruffen follen

Nit wei  ich was fie machen wollen.

Philomates.

Den K nig fah ich gar fr h heut

Gehen in groffer traurigkeit/

Was jhm aher gelegen an/

Kan ich f rwar kein wiffens han

Sempronius.

Da man n cht nam das Abendmal/

Da ift er auch fampt feim Gemahl/

Nit kommen hin mich wundert fehr

Ob

C7^r

Ob jhm was angelegen wer/
 Sonft pflegt er allzeit kommen hin
 Nit weiß ich was jhm ift im Sinn.
 Schawt zu da kompt er mit feim Gfind/
 Wir wollen mit jhm gehen gschwind/
 Vns fetzen wie es sich gebürt
 Auffhorchen was da wird gerürt.

Actus iij. Scena iij.

Ninus/ Thrax/ Memphitis/ Philomates/
 Sempronius/ Lifcus/ Simeon/ Labienus
 Eubulus/ Gnaio / Griffio/
 Sathan.

Wolan weil ich hab außgefandt/
 Die Botten hin in alle Land/
 Das man zu mir hie bringe an
 Alle Warfager fo man kan
 Auftreiben/ dann ich will noch heut
 Erfahren was mein Traum bedeut/
 So folt jhr fleißig hören zu
 Was jhr jeglich er fagen thu.
 Nun laft mir fie all kommen her
 Jch will ihn fagen mein beger.

Thrax.

Auß gnädiger bitt vnd begern
 Nini deß Großmächtigen Herrn/
 Der da vnüberwindlich ift
 Mit Land vnd Leut gar wol gerürt/
 Sein wir kommen zu offenbarn
 Die in warfagens Kunft erfahrn/
 Träum außzulegen find wir gut

Als

C7^v

Alls was man vns anbringen thut/
 Auß manchen Ländern find wir da/
 Auß Thracia/ Sicilia/
 Egypten vnd auch India/
 Deßgleich Franckreich/ Hispania.
 Ein fondern Geift müßten wir han
 Der vns folche ding zeiget an/
 Darmit wir andern Leuten fein
 Hierinn können verholffen fein/
 Darumb Herr König zeiget an/
 Weißhalb jhr vns habt fordern lan.

Ninus.

Ewer ankunfft gefalt mir wol
 Welches ich billich loben foll.
 Was aber angelegen mir
 Will ich euch jetzund bringen für/
 Dann folches wie jhr werd bericht
 Von wegen eines Traums gefchicht.
 Deß halben wolt ich/ das jhr mich
 Bericht/ vnnd außlegt eygentlich/
 Dann mich der selb krencket so fehr
 Das ich schier nit kan leben mehr:
 Drumb groffen fleiß wolt kehren an/
 Jch wils nit vnnergolten lan/
 Vnd horchet mir zu alle gleich
 Den Traum will ich erzehlen euch.
 Mir traumbt wie Jch vnd mein Gemahl
 Gefchäftfrey waren vberal/
 Begunten zu spatzieren auß
 Auff eine grüne Heyd hinauß/
 Welche geziert mit Rosen frey
 Vnd Blümelein gar mancherley.

Da

C8^r

Da fassen wir beyde allein/
Mitten vnder den Blümelein/
Vnd redten da von sachen viel
Die vns betreffen an dem ziel/
Da fieng sie einsmals schreyen an
Als hett man jhr groß Leyd gethan/
Sihe da sahe ich geschwind
Das sie gebare gleich zwey Kind/
Auff einmal wie ich euch hie sag
Darzu mit jämlicher klag/
Da namen wir die Kinder beyd
Legten sie zu vns auff der Heyd/
Vnd hatten große frewd darab/
Als ich kaum ie gefehen hab.
Bald ich vnd sie da schlieffen eyn
Theten ohn alle forgen fein/
Sihe da kam daher gelauffen
Ein Hirfch in feiner brunft vnd schnauffen/
Nam vnuerfehens vnd geschwind
Auff sein Gehörn die beyde Kind/
Lieff hefftig vnd geschwind daruon
Die Kinder schreyen ohn ablon/
In wilden Wald trug er sie beyd
Vnd wûrcket noch ein großes leyd/
Als sie da lagen auff seim Gehörn
Theten ein klâglich gschrey verführn/
Nach folcher jämlichen noht
Fand man sie beyde ligen todt/
Da sahe man gar eygentlich
Wie sie der Hirfch so graufamlich/
Mit seim Gehörn hatte verletzt
Jhr junge Hertzen auffgeschlitzt/

Was

C8^v

Was mir nun diefer Traum bedeut
Hab ich euch laffen fordern heut/
Das jhr jhn folt außlegen mir
Dann er mich krencket für vnd für.
Memphitis.

Nun haben wirs gar wol verftanden
Was euch Herr Kônig geh zuhanden/
Den Traum wollen wir legen auß
Darab ift vns allen nit grauß.
Ninus.

So will ich das jhr geht dort vmb
Vnd einer nach dem andern kumb/
So kan ich nemmen ab gar fein
Ob jhr all ftimmet vbereyn/
Du Thrax bleib hie vnd achtung hab
Die andern follen tretten ab/
Jetzt fag mir Thrax herauffter frey
Was dauon deine meynung fey.

Thrax der erft Warfager.

GEnädigfter Kônig vnd Herr
Wiewol der Traum ift zimlich fchwer/
Will ich fein deutung zeigen an
Aber doch fo gut als ichs kan/
Es bedeut das jhr werdet gar bald
Jagen in einem wilden Wald/
Da werdet jhr deß Wilds fo viel
Von Hirfchen/ Schweinen ohne ziel
Antreffen/ da groß forg aufffteht
Vnd wie jhr weiter habt geredt/
Nemlich von ewern Kindern beyd

Die

D1^r

Die bdeuten groffe trawrigkeit/
 Dann weil jhr werd beim Jagen fein
 Wird man ewer Hauß nemmen eyn/
 Allweil ewer Gemahl ſchlaffen wird
 Werden euch ewer Kind entfuhr/
 Ja weit vnd fern in frembde Land
 Da werden ſie fein vnbekandt/
 Endtlich werden ſie ohn betracht
 Von böfen Leuten vmbgebracht.
 Darumb Herr Kônig ſehet zu
 Das euch diß nit berühren thu/
 Das ift fein deutung eigentlich
 Weiter ſo kan nit fagen ich.

Ninus.

Tritt du nur ab/ ſo will ich dann
 Ein andern hieuon reden Ion.

Philomates.

Mich dunckt er kôn die Kunft nit recht/
 Dann feine deutung ift gar ſchlecht

Memphitis der ander.

GEnedigfter Kônig vnd Herr
 Hie komm ich auch auff ewer bger/
 Erzehlten Traum zu deuten wol
 Wiewol er jrrens ift gar voll/
 Groffen fleiß will ich kehren an
 Darmit ich es wol treffen kan/
 Dann ich bin ſonft ein Medicus
 Darzu ein guter Phyficus/
 Jch mein es kôn mir fâhlen nicht/
 Soll war fein wie ich euch bericht.

D

D1^v

Da euch also getraumet hat/
 Giengen jhr schlaffen zimlich spat/
 Vnd fallen gar zu lang beym Wein
 Biß das jhr truncken worden fein/
 Darauff jhr gleich giengen zu ruh
 Jft war wie ich euch fagen thu/
 Als jhr ein klein weil schlieffen do
 Ward erft prima concoctio
 Das reucht euch biß in Cerebrum
 Propter tam plenum ftomachum,
 Welche vapores folchs betracht
 Imaginationes gmacht
 Also ift euch auch kommen vor
 Was jhr vorhin gethan ift wor.
 Vnd wann jhr truncken worden find
 So zürnt jhr vber Weib vnd Kindt/
 Nachmalen ift es euch gar leyd
 Bringt euch in groffe trawrigkeit.
 Das jhr habt folches gfangen an
 Wie ewer Hertz felbs wiffen kan/
 Also fag ich das diß geficht
 Hab gantz vnd gar zu bdeuten nicht/
 Laft es euch nit angelegen fein
 Diß ift also die meynung mein.
 Ninus.
 Wolan nun bringt den dritten her
 Das ers auch fag auff mein beger.
 Sempronius.
 Die fach die laft fich feltzam an
 Als wann folchs jhren keiner kan
 Dann lie ftimmen nicht vbereyn
 Nit weiß ich wer der beft wird fein.

Lificus

D2^r

Lificus der dritt.

WJe ewer K niglich Maieftet/
Vorhin mit vns hat abgeredt/
Wegen de  Traums drumb komm ich her
Auff ewer Maieftet beger/
Was mein Gefelln f r ein bericht
Gegeben han das wei  ich nicht/
Jch bin fonft ein Philofophus
Ein gwaltiger Aftronomus/
Kan au  de  Himmels lauff wol fehn
Was fchon oder noch werd gefchehn/
Die Sonn war in dem 3willing eben
Als fich der Traum mit euch begeben.
Weil euch getraumbt von Kinden 3wey
Vnd jhrem fchaden mancherley/
Dann di  Zeichen fo ftarck f rwar
Das es eynnimpt den Menfchen gar:
Vorab wer fehr forgt vmb fein Kind
Dem kan folches gefchehen g chwind/
Derhalben mein Herr K nig nicht
Darf r forget euch nichts gefchicht/
Hat gantz vnd gar nichts zubedeuten
D rfft auch nit glauben ander Leuten/
Glaubet auch meinen Gfellen nicht
F rwar gar falch ift jr bericht
La t es nur alfo darbey bleiben
Jhr d rfft weiter darauff nit treiben/
Jch la  alfo gut fein die fach
Thut nur Herr K nig fein gemach/
Wann euch was widerfahren foll/
So werdet ir es fehen wol.

D ij

D2^v

Ninus.

Mich dunckt wie es auch war fein wird
 Du habst dein Kunst nit recht ftudiert/
 Nun rufft dem vierten auch hereyn
 Das er anfang die meynung fein.

Simeon.

Nun haben wir schon dreyerley
 Ich will glauben das keins war fey:
 Das vnder diefen keins fey war
 Kan man darauß abnehmen klar.

Labienus der viert.

HJe tritt ich auch auff difen plan
 Als ein gar weitberühmter Mann/
 In warfagen erfahren wol
 Drum man mich billich ehren sol/
 Dann mir weiffagens Kunst herkömpt
 Von den Sybillen weit berühmt/
 Nun aber vbertriff ich sie
 Das darff ich käcklich fagen hie:
 Wolt mich darfür auch nit außgeben
 Wann man mir könt hie widerftreben.
 So sag ich euch Herr König diß
 Ihr solt es glauben ift gewiß/
 Das diefer Traum bedeuten thu
 Krieg/ Blutvergieffen vnd vnrhu/
 Welchs durch den Türcken foll gefchehn
 Vnd er bey euch wird vnderftehn:
 Wird euch entführen Weib vnd Kind
 In Afiam darzu gefchwind/
 Das wird fein der gar wilde Wald

Da

D3^r

Darinn der Bären manigfalt/
 Wie euch getraumbt von mancherley
 Wilden Thieren/ fo sag ich frey
 Das jhr Hertzen beyd jung vnd alten
 Mit dem Sebel werden zerpalten/
 Wie euch getraumbt von einer Heyd
 Die schön mit Blumen war bekleidt/
 Das ift das obgemelte Land
 Darinnen find man allerhand/
 Ja schöne lachen mancherley
 Darumb diß meine meinung sey.
 Wie obgemelt vnd ift gewiß
 Anderft kan ich nit deuten diß.
 Darumb möcht euch wol fehen vor
 Das folchs nit etwan werde wor/
 Solchs sag ich euch vor andern Leuten
 Besser wird euch jhn niemand deuten.

Eubulus.

Das wer ein feltzam wunderding
 Fürwar darzu nit gar gering
 Aber man kan sich dran nit kehren/

Ninus.

Nun wil ich auch den fünfften hören/
 Wil gern fehn wo es wil hinauß
 Sie machen mir schier alle grauß.

Gnato der fünfft.

NVn bin ich auch kommen hieher
 Auff ewer Maieftat beger/
 Zu deuten was vns vor ift bracht/
 Welches ich dann für zimlich acht/

D ij

D3^v

Dann der Traum leicht zu deuten ist
 Darff nit viel groffe Kunft vnd List.
 Ich kan es käcklich sagen an
 Das so lang diefe Welt thut ftahn/
 Meins gleichen ist gewefen nie
 In kunft erfahrn das sag ich hie.
 Wann ich will/ muß es finfter werden
 Das man nit ficht Himmel vnd Erden/
 Wann ich wil/ ja ich wil nit liegen
 All Vögel müffen zu mir fliegen/
 Muß jeder wie ich euch thu sagen
 Ein Kron in feinem Schnabel tragen:
 Die müffen fie mir bringen zu
 Doch wann ich es begeren thu.
 Darumb lieber Herr König mein
 Was deß Traums wird bedeutung fein/
 Wil ich euch kürtzlich zeigen an
 Dann ichs mit kurtzen worten kan/
 Es wird vber ein halbes Jahr
 Ewer Haußfraw folchs machen war/
 Vnd euch gebären zwey Kinderlein
 Ein Söhnlein vnd ein Töchterlein/
 Die werden doch nit lang da leben
 Sondern bald jhren Geift auffgeben/
 Das wird euch bringen folchen schmerzen
 Als wann jhr hetten in dem Hertzen/
 Ein schneident Schwert/ vor groffem leyd
 Werdet jr sterben auch all beyd:
 Werd euch bekümmern also sehr
 Im wilden Wald lauffen vmbheer/
 Wie euch dauon geträumet hat
 Darumb so m[öc]ht jr fuchen raht/

Diß

D4^r

Diß ist mein meinung sage ich
Vnd feine deutung eygentlich.

Ninus.

Nun bringet auch den letften her
Wil hören was anzeige er/
Jch sih vnd spüre allgemach
Das schon vergebens ist mein fach.

Philomates.

Sie kommen gar nicht vbereyn
Nit weiß ich was jhr thun mag fein.

Griffo der fecht.

HJe komm ich auch zu zeigen an
Was ich für Künft gelehret han/
Träum außzulegen bin ich gschwind
Durch Arithmetiam ichs find/
Vorab wanns anlangt groffe zal
Wil ichs auff wenigft in zwey mal
Finden/ was es bedeuten mag/
Derhalben ich ftåts bey mir trag/
Ein Tafel wie auch eine Kreiden
Dann ich fein weiß zu vnderfcheiden/
Die zal/ mit zal zu subtrahirn
Multiplicirn vnd diuidirn/
Was aber diefer Traum bedeut
Darff ich erft nit gedencken weit/
Sondern weil es ist zwey vnd zwey
Deßgleichen auch ein Hirfch darbey/
Zwey alte Menfchen vnd zwey Kind
Wils mit eim multiplicirn gschwind/
Erftlich ein mal zwey/ das ist zwey

D4^v

Ein mal zwey/ das ist wider zwey
 Die summa zwey vnd zwentzig bringt
 Welchs mir furwar gar fein gelingt/
 So muß ich darauß nemmen ab
 Was er dann zu bedeuten hab/
 Das in der zwey vnd zwentzigft stund
 Jhr allfamt folt gehen zu grund:
 Darumb Herr König rufft euch eben
 Das jhr anfelt ein gutes leben
 Ohn zweiffel haben mein Gefellen/
 Jhr meynung also thun anstellen.

Ninus.

Noch hat mich keiner brichtet recht
 Ewr aller deutung ist gar schlecht/
 Keiner stimpft auch nit vberlein
 Mit dem andern der meynung fein/
 Drum laßt sie kommen all für mich
 Euch wil die Kunft auß lehren ich.
 Wolan kompt her jhr Gefellen all
 Jhr Meinydigen allzumal
 Jhr vngefchickte Efel groß
 Bößwichter vber alle moß/
 Warumb begert jr eigentlich
 Zu narren vnd betriegen mich/
 Der ich mit groffem kofen euch
 Hab fordern lassen alle gleich/
 Das jhr mir folt beholffen sein
 In diefer schweren sachen mein:
 Nun hab ich/ wie ich auch begert
 Einen nach dem andern gehört
 So sag ich das vnd ist gewiß

Das

D5^r

Das ewer keiner kōnne diß/
Ja ich sag bey der Trewe mein
Keiner ftimpt mit dem andern eyn/
Einer sagt diß der an der das
Das ich felber nit mehr weiß was/
Drumb vmb deß groffen kostens willen
Will ich mein macht an euch erfüllen/
Das jhr es thun folt keinem mehr
Wie jhr darumb feit kommen her/
Bey meiner Kron vnd Scepter gut
Schwer ich bey Kōniglichem muht/
Das jhr heut follet alle fterben
Am Galgen drauß zumal verderben.

Griffo.

O weh/ Herr Kōnig erbarmet euch/
Thrax.

O weh wir bitten all zugleich.

Gnato.

Herr Kōnig ich wils nit mehr thon
Memphitis.

Jch wil heim laft mich wider gohn.

Ninus.

An Galgen muftu gehen heut
Dann dir dein Heymat ift zu weit.

Lifcus.

O wie wil ich mein Leben anfangen
Man wil mich an den Galgen hangen?
Jch fih wol es hilfft gar kein klagen
Der Teuffel hat vns her getragen.

Labienus.

Ey mein Herr Kōnig vmb Gnad ich bitt/
Jch kan vnd weiß zufterben nit.

D v

D5^v

Ninus.

Halts maul vnd laß mich vngeplagt

Griffo.

Das heißt Teuffels hüpfch wargefagt/
Hat man deßhalb nach vns thun fchicken
Das wir am ftrang follen erflicken?

Thrax.

Herr Kônig ich will bitten was
Jhr folt vns nit verfagen das:
Ein Kunft wil ich probieren noch
Allhie für ewern Augen doch/
Mein Gfellen follen bey mir fein
Dann ich folchs nit kan allein.

Ninus.

Wolan ich gib dir fo viel frift
Wo ferr darbey kein gfahr nit ift.

Thrax.

Nun geht herbey ihr Gfellen mein
In diefen Circkel allgemein/
Den ich mit diefem ftecken mach
Vnd gebt fein acht auff ewer fach/
Keiner foll reden hie ein wort
Oder fürwar er wird ermordt
Keiner fol gehen auch darauß
Wann jhm fchon wird ein wenig grauß
Dann ich will noch ein Kunft probieren
Die Teuffel allefampt befchweren/
Nun gebt achtung vnd fchweiget ftill/
Die fach ich nun anfahen will.

Zauberwort.

Scheroc + Paletza + Repko

Loffke + Hefco, Caifo Beramberhe.

O weh/

D6^r

O weh/ Jch hab vergeffen was
 Sathan.
 Wart ich will dich lehren baß.
 Labienuß.
 Laufft/ laufft/ jr Burft der Teuffel kumpt/
 Horcht wie er auß der Erden brumpt.
 Lificus.
 O weh/ o weh jhr Götter all
 Helfft /helfft/ o helfft vns allzumal.
 Memphitis.
 O weh du ſchwartzzer Teuffel geh
 O laufft/ laufft/ laufft/ o weh/ o weh.
 Ninus.
 O Jupiter du ftarcker Gott
 Ach hilf vns doch in aller noht.
 Mufica.

 Argument oder inhalt deß
 vierten Actus.

DEr vierdt Actus tompt herbey
 Darinn ihr werdet fehen frey/
 Wie Thysbe das betrübte Blut
 Jr fachen fein anfchicken thut/
 Vnd wagt ſich durch die ſchlaffend Wacht
 Herauß zu gehn wie ſie es gmacht.
 Aber wie ſie am erften kam
 Von Pyramo noch nichts vernam.
 Setzt ſich derhalb zu warten fein
 Groß vnfahl aber kam darein.

Dann

D6^v

Dann vnuerfehens lieff daher
Ein Löwin da erfchrack fie fehr/
Lieff bald daruon dacht nit mehr dran
Das fie den Mantel ligen lan/
Welchen die Löwin zriffen hat
Darauff gleich in Wald wider gaht/
Hie zwifchen Pyramus auch kam
Von Thysbe noch gar nichts vernam/
Allein fah er dafelbft jhr Kleyd
Empfieng gar groffe trawrigkeit/
Vermeint die Thier han fie gefreffen
Darüber er fein felbs vergeffen/
3og auß fein Schwert in folchem fchmertz
Erticht fich felbs das junge Hertz/
Darauff bald Thysbe in eim fchreck
Kompt vnd ficht ob die Löwin wegt/
Find Pyramum jhrn liebften gut
Todt ligen in feim eignen Blut/
Gedacht wol vnd fagt das ohn fchew
Daß das vmb fie gefchehen fey/
Führt da ein jämerliche klag
Die niemand nit außfprechen mag
Nam bald das Schwert auß feinem Leib
Erticht fich auch das btrübte Weib.
Was weiter wird von jhnen glagt
Werd ihr hören im fünfften Act/
Hört fleiffig zu vnd fchweiget ftill
Horcht wie es weiter gehen will.

Actus

D7^r

Actus iiij. Scena j.

Die Soldaten.

Der erft:

Juch hoſcha/ luſtig auff jhr Burft/

Der ander:

O wie leyd ich ſo groffen durft/

Du Landsman gib mir her das Logel/

Es gilt dir einen hüpfcher Vogel.

Der dritt:

Sauff jimmer hin du grober knoll

Du haſt kein rhu du feyft dann voll/

Biß das man dich daruon muß tragen/

Vnd auff deinem Bauch kan Trumē ſchlagen.

Der viert:

Jch weiß was wir jetzt machen wöllen/

Jhr gute Brüder vnd Gefellen

Das Hirn das iſt vns zimlich offen

Weil wir den gantzen Tag geoffen/

Lieber thu eins/ du Bruder Fridlein/

Vnd ſing vns ein Studenten Liedlein.

Der erft:

Jch will es thun feit luſtig jhr

Vergeft aber nit zu bringen mir

Der ander:

Schaw welcher Narr hat dich geſtochen/

Das du diß hohe Glaß zerbrochen:

Beim hier vnd dort es mich nit jrret/

Geh hin bezals dem Kronenwirth.

Der

D7^v

Der dritt.

Ey laß jetzund das Narrenwerck/
 Vnd fein fleißig auff's Liedlein merck
 Es ist g'fchehn wider meinen willen
 Ich will den Wirth wol wider ftillen.

Der erft fingt.

Im Thon/ Ach Hertzigs Hertz/ 7c.

DEr Harpffen klang/ d3 gfang
 der Vögelein/ gar fein vñ lieblich bey
 des thut erklingen/ der Mufic fchall
 gantz vberall/ das Hertz macht frewdig (prin-
 gen.

Venus dein gewalt/ gar bald bewegen thut/
 dann muht fo bald derfelbig wird berühret/ mit
 füßem fchein/ kompt der in pein/ wird jämmerlich
 verführet.

Die Mufic gut/ macht muht vnnd hilfft ge-
 fchwind/ wo find fo Venus hat gar hart ver-
 wundet/ beydes in fchertz/ es geht zu hertz/ zu
 weilen in einer ftunde.

Die Nachtigall/ mit fchall im grünen Wald/
 im Sommer bald jhr ftimmlein thut erfchwin-
 gen/ die macht vil frewd/ vertreibt das leyd/ vnd
 thut gar lieblich fingen.

Doch nit allein in gemein/ deß Menfchen
 Hertz/ von fchmert3 wird gantz vnd gar gefreyet/
 Amphions Kunft/ war nit vmbfonft/ die Bäume
 han fich geneiget.

Die

D8^r

Die Fellen all vom ſchall/ gehupffet fein/ von
ſich allein zu hauffen ſind gegangen/ vmb The-
bæ ſchon/ theten ſie gohn/ dieſelbig Statt vmb-
fangen.

Manch trawrigs Hertz/ von ſchmert3 erle-
digt wirdt/ vnd wie gehört/ dieſelben ſehr erfre-
wet/ manch junges Blut/ bewegen thut/ vnnd
lieblich ſich erzeiget.

Solchs hat gethan/ gar ſchon die Muſica/
dann da ſoll man die Kunft gantz hoch verehrē/
brauchen zu frewd/ vnd auch zu leyd/ deß Men-
ſchen kräfte zu mehren.

Auch alle die/ ſo ſie bey Tag vnd Nacht/ mit
macht zu üben ſind allzeit geneiget/ den wün-
ſchen wir mit groffer begier/ viel hundert tau-
ſent frewden.

Jetzt entchlaffen die Soldaten/ vnd
geht Thysbe durch ſie hinauß.

[Holzschnitt]

Actus

D8^v

Actus iiij. Scena ij.

Thysbe.

WJe angft war mir biß ich hieher
Bin kommen fo mit fchrecken fehr/
Die Wächter folten wachen zwar
Aber ich fahe keinen dar/
Der feine Augen offen hett
Jch will gefchweigen forgen thet/
Nächten waren fie alle voll
Fraffen vnd loffen fich fo doll/
Das fie jetzt ligen fchlaffen all
Weiß nit wie es dem König gfall/
Aber folchs kompt nur mir zu gut
Vielleicht fchon Pyramus warten thut/
Drumb muß ich gehen jetzt hinauß
Groß luft vnd frewd zu holen drauß/
Wiewol es ift noch zimlich früh
Kan ich vor Lieb nit bleiben hie
Jch will zum Brunnen gehen hin
Nach meines allerliebften Sinn.
Ach helfft jhr Götter/ helffet mir
Das ich der Lieb genieffe fchier/
Ach das ich feh her reiten fchon
Mein Allerliebften wolgethon
Das Hertz wer mir voll groffer frewd
Verduft wer hin alles mein Leyd.
Mein Leib hab ich gefchnüret eyn
Gezieret vnd verfehen fein/
Kein Menfch foll mich auffpreifen fchon
Dann eben eines Grafen Sohn.
Hieher fo wil ich mich nun fetzen

Vnd

E1^r

Vnd mit dem schönften mich ergetzen/
 Will warten auff den Liebften mein
 Bey diefem frifchen Brünnelein.

Actus iiij. Scena iij.
 Thrafo der Wachtmeifter.

JCh muß ein mal gehn fehen zu/
 Wie fich die Wacht verhalten thu/
 Dann fie bißweilen ficher fein
 Freffen vnd fauffen fich voll Wein/
 Haben fo gantz vnd gar kein acht
 Es fey gleich Tag oder Nacht:
 Wann vnglück folt vielleicht entfehn
 So muß es vber mich außgehn/
 Nun hab ich fie fchon oft erdapt
 Das fie fo gar kein achtung ghabt.
 Schawt wie fie doch dort ligen all
 Schlaffen vnd fchnarchen allzumal:
 Halt ich wil fie gehn wecken auff
 Mit dem Spieß fchlagen in den hauff/
 Auff/ auff ich wil euch wecken bhend
 Das euch botz hundert Raſperment.
 Der erft Soldat.
 O weh/ wer da/ wer fchlecht mich fo?
 Herr Wachtmeifter botz feit jhr do?

Wachtmeifter.
 Wart ich wil dich auffbringen gſchwind
 Den Spieß meffen vmb deinen grind.
 Der ander:
 O laßt mich nur jetzt noch leben
 Jch wii euch hie zu trincken geben/

E1^v

Es war mir in dem Haupt so weh

Das ich kont wachen nimmermehr/
 Mein Gfell der hat mir einen bracht

Der hat mich so vnluftig gmacht.

Der hat mich so vnluftig gmacht.

Wachtmeister.

Hab acht ich wil dich luftig machen

Du folt es aber nit gelachen.

Der dritt:

Herr Wachtmeister ach laft mich gehn

Es sol hinfort nit mehr gefchehn/
 Wir wollen groffen fleiß ankehren

Wir wollen groffen fleiß ankehren

Deß wil ich euch ein Eyd hie schweren.

Wachtmeister.

Wolan bey meiner Trew ich sag

Das jhr forthin bey Nacht vnd Tag

Solt haben ftätigs gute Wacht

Darmit kein klag von euch gebracht:

Oder ich wil mit euch vmbgahn

Welchs ich lieber wolt vnderlan/
 Ein folch Trinckgelt wirt man euch schencken

Ein folch Trinckgelt wirt man euch schencken

Das jr darnach daran werd dencken/
 Trewlich von gantzem Hertzen mein

Trewlich von gantzem Hertzen mein

Laft euch difes gefaget fein/
 Damit ich nit verurfacht werd

Damit ich nit verurfacht werd

Dem Kônig zſagen folch beſchwerd
 Hiemit vernempt die Lofung auch

Hiemit vernempt die Lofung auch

Nach Kriegs herkommen vnd gebrauch

Ein vberauß fehr ſchöne Lind/
 zu Baſel in der Statt man find

zu Baſel in der Statt man find

} Lofūg.

Nun wil ich wider gehen fort

Lieber gedenckt an meine wort.

Actus

E2^r

Actus iiij. Scena iiij.

Thysbe.

Weh was für ein schrecklich Thier
 Kompt da gegangen her zu mir/
 Wo soll ich auß/ wo soll ich eyn
 Verlohren hab ich das Leben mein/
 Ach Pyrame ach hilff mir doch/
 Ach eyl bald wilt mich fehen noch/
 Jch wil fliehen in difen Wald
 Vielleicht so wird er kommen bald.
 Mein Mantel hab ich ligen lahn
 Darff aber nit mehr hinzu gahn/
 Sonft vbereylt mich dieses Thier
 Wil jhn wol wider finden schier.

Actus iiij. Scena v.

Pyramus.

JN groffer frewd vnd fröligkeit
 Wil ich hin reiten allbereit/
 Suchen mein allerliebftes Hertz
 Die mir gemacht schon manchen schmerz:
 Die mich oft bracht in trawrigkeit
 Auch widerumb in fröligkeit.
 Jch hoff heut sol mirs wol ergehn
 Der Lieb auch ein vernügen gchehn/
 Ja heut sol fein der Frewdentag
 An dem ich mich erquicken mag/
 Wann es nur recht ist angefelt
 Vnd kein vnfahl darzwifchen felt
 Vnd sie sicher sey kommen auß/
 Vor den Wächtern auß jhrem Hauß/

E ij

E2^v

Oder ob sie noch drinnen sey
 Vnd sich berathschlag mancherley/
 Doch will ich nur tracks rheiten fort
 Vielleicht wird sie schon warten dort.

Hie soll sie sonsten warten mein
 Nit weiß ich wo sie möge sein/
 Schaw ist nit dieses Thysbes Kleyd?
 Welchs sie nur pflegt anthun zur frewd.
 O weh was wird bedeuten diß
 Das ist jhr Mantel ist gewiß/
 Thysbe/ Thysbe/ ach wo bistu?
 Wo steckstu Thysbe geh herzu.
 Ach dieser Mantel ist fürwar
 zerriffen vnd zerzerret gar/
 O Thysbe wie bringst mich in noht/
 Ich dich vnd spur/ das du bist todt.
 Ach ich muß eygentlich verstaun
 Das dich die Thier zerriffen han/
 Du kanst nun nit mehr sein daheim
 Das zeigt an der Mantel dein.
 O Vnfal groß/ o groffe noht
 Nun bringst mich gewiß auch in den Todt
 Das ding das kan ich nit erleyden/
 Mein Sinn von meinem Leib abscheyden/
 O Thysbe du holdfeligs Hertz/
 Was machstu mir da für ein schmerz?
 O der vnglückhafftigen stund
 Da ich erstlich sah deinen Mund/
 Han dich die Thier gefressen gar
 So kost es auch mein Leib fürwar/
 Ach/ ach das muß erbarmen Gott

Das

E3^r

Das ich komm fo in groſſe noht.
 Ach/ was thu ich auff dieſer Welt/
 Was iſt mir doch für vnglück gfeilt?
 Verjamert iſt mein Hertz vnd Sinn
 Das ich nit bey mir felber bin/
 Thysbe/ Thysbe/ du edles Weib
 Ach wo iſt hinkommen dein Leib?
 Ach wo find hin dein ſchöne Hând?
 Die mich gebracht in folch elend.
 Wo find dein holdfelige Augen?
 Du ſchöne Kron aller Jungfrauen.
 Schad iſt es/ das die wilden Thier
 Verwûſten follten folche zier/
 Dein Leib iſt werth ſag ich fürwar
 Das er dem ſchönſten Golde klar
 Verglichen werd/ o Thysbe mein
 Wo find die ſchönſten ârmlein dein?
 Wolan biſtu vmb mich geſtorben/
 Vmb meine Lieb | allhie verdorben/
 So foll mein eygen Schwert das rechnen
 Welchs ich felbs durch mein Hertz wil ftechē
 Dein Lieb wil ich bezahlen wol/
 Kein Weib vmb mich ſterben fol.
 Nun gſegne ich all Menſchen hie
 Was ward erfchaffen je vnd je.
 Geſegne dich du liebe Sonn
 Das Firmament/ ja Stern vnd Mon/
 Die jhr mit ewerm hellen ſchein
 Mir oft geleucht zur Liebe mein.
 Gefegnet ſeit ihr Berg vnd Thal
 Was in der Welt iſt vberal/
 Ja Laub vnd Graß geſegne Gott

E3^v

Zu taufent mal red ich ohn spott.
 Thysbe zu taufent guter Nacht
 Dar zu hat vns die Lieb gebracht:
 Ach gute Nacht du Edles Weib
 Die du fteckft in der Thierer Leib/
 Wüft ich welchs Thier dich hett gefreffen
 Ich wolt der Liebe nit vergeffen/
 Wolt dich auß feinem Leib außtrennen
 Vnd noch mein liebften Schatz mich nennē/
 Aber ich wil dich in meim Hertzen
 Suchen mit difem Schwert ohn fchmertzē/
 Nun fey ein end an difen dingen
 D3 Schwert fol jetzt mein Hertz durchtringē
 Wolan jhr Götter fteht mir bey
 Mein Todt ein Zeich der Liebe fey.

Actus iiij. Scena vj.

Thysbe.

NVn wil ich auch gehn wider hin
 Da ich zuuor gewefen bin/
 Vielleicht fo ift die Löwin wegk
 Die mir gebracht ein folchen fchreck/
 Ich fich nichts mehr/ deß bin ich fro
 Dann nur ein Pferd daß ftehet do/
 Es ift deß Pyrami gewiß
 Nit weiß ich was bedeutet diß/
 Daß das Pferd ftehet hie allein
 Vnd niemand thut bey jhm da fein/
 O wer ligt auff der Erden dort
 Als wer er todte vnd gar ermordt?
 O weh/ o weh der groffen noht

Hie

E4^r

Hie ligt mein Pyramus ift todt/
 Vmb meinet willen das gefchicht
 Hats jhm felbs gthan ift anderft nicht:
 Fürwar hat es der Mantel gmacht
 Solch Hertzzenleyd zuwegen bracht
 O Pyrame du liebes Hertz
 O liebfter Schatz deß groffen fchmertz/
 O weh ich muß verfincken gar
 Wann ich gedenck der groffen gfahr/
 Venus verflucht fey dein gewalt
 Wie machftu doch vnglück fo bald
 Wie züntftu an fo bald ein Fewr?
 Welches vns hie wird faur vnd theur.
 Ach fag doch dauren wir dich nicht/
 Die wir erbärmlich zu gericht/
 Ein fteinern Hertz folt fich fürwar
 Ab diefem ding entfetzen gar/
 Jch glaub das in dem Leben hie
 Solch trawrig ding gefchehen nie:
 Jch weiß nit was mein Hertz doch macht
 Dann es in meim Leib ftätigs kracht.
 Denn Pyramus mich hefftig krenckt
 Der hie ligt in dem Blut verfenckt.
 Ach ift kein Menfch vorhanden nit
 Der doch zugegen trawre mit?
 Der doch beklage allbereit
 Diß vberauß groß Hertzzenleyd.
 Ach Pyrame du theurer Held
 Wer hat vns doch das vnglück gfelt?
 O fchaw dein Thysbe ift bey dir/
 Thu auff dein Augen fchöne Zier.

E4^v

O liebes Hertz bleib lebend doch/
Ach ist ein Athem in dir noch
All kräfte find von dir gewichen
Dein schöner Mund ist gar verblichen.
Dein Augen haften zugethan
Können mich nicht mehr sehen an/
Dein Hertz das ist geöffnet dir
Die Liebe anzuzeigen mir/
Dein Leib schön vber alle maß
Dir ist von rotem Blut gar naß.
Was soll ich aber jetzt und thun
Das du bist todt das seh ich nun/
Ich will das Leyd bezahlen wol
Dein Schwert mich auch ertöden soll.
So nimm ich hier das Schwert auß dir
Und steich es auch in Leibe mir.
Hiemit gefegne ich zuhand
O dich mein liebes Vatterland/
Gefegnet seit ihr Eltern mein
Mein liebe Freund all in gemein/
O liebe Mutter wüßtestu
Was Leyd ich hier anrichten thu?
O weh daß groffen Hertenleyd
Das ihr erfahren solt all beyd/
Aber das muß nun also sein
Ich hab bey mir beschloffen eyn/
Gefegnet sey Himmel und Erd
Alls was darinn begriffen werd/
Feur/ Wasser/ Luft gefegne Gott
Auch alle Menschen früh und spat/
Gefegnet sein mein Gespielen all
Und die mich kennen vberall/

Den

E5^r

Den wünsch ich alln ein gute Nacht
Auch denen so mich han bewacht/
Mein Eltern so ich genennet eh
Die sich ich jetzund nimmermehr
Du liebes Pferd zu guter Nacht
Mein Pyramum haft her gebracht/
Mein Liebsten haftu her getragen
Ach hilff mir keinen jamer klagen/
Reiß dich nun ab vnd lauff darvon
Dein Herren mußt dahinden lohn.
Nun will ich machen auch ein end
Sich Pyrame nimb meine Händ/
Gefegne dich der liebe Gott
Zu dir wil ich jetzt in den Todt:
Mein Blut das dein berühren sol
Dann es fürwar der Liebe voll/
Nun wil ich vnser Leiber beyd
Den wilden Thieren allbereit
Befehlen/ die vns sollen verzehren
Den wirds vielleicht kein Mensch erwehre/
Die Sonn woll noch ein kleine zeit
Anscheinen vnser Leiber beyd
Du liebe Sonn gefegne dich Gott
Jetzt leb ich/ bald so bin ich todt.
Jhr Bäume wolt vns in solchem Leyd
Bedecken auch in trawrigkeit/
Wolan das Schwert so Pyramum
Den liebsten mein thet bringen vmb/
Das soll mein Hertz deßgleich durch tringen
Vnd groffe trawrigkeit mit bringen/
So dencket nun auch allezeit
Der Thysbes biß in ewigkeit.

E5^v

Hie kommen die Nymphæ in den
Wald/ vnd beklagen dife beyde.

Jhr Schweltern eylt behend
Schawt lieber fchawt w3 hat fich zugetragē?
Die beyde junge Hertzen find erfchlagen/
Ach ifts nit ein elend?

2.

Venns hat fie ertôdt/
Man ficht wie ihre Hertzen noch find offen/
Cupido hat fie mit feim Pfeil getroffen/
Fürwar jetzt klag entfteht.

3.

Jhr lieben Schweltern zart
Wir wôllen vnfere grüne Krantz ablegen/
Vnd trawren fo fehr wir jmmer môgen/
Jch will fein vngelpart.

1.

Secht wie find fie verblut?
An dem ort da jhr blut ift hin gefloffen/
Jft ein fchôner Maulbeerbaum entfproffen/
Die trawrig Erd das thut.

2.

Newlich es auch gefchach
Da der Jüngling Narciffus ift geftorben/
Bey dem Bruñen auß thorheit gantz verdor=

Als bald ein Blum man fach. (ben/

3.

Adonis der jung Gfell/
Welchen Venus fo hertzlich hat geliebet/
Hernach vmb feinet willen war betrûbet/
Drumb das er vmbkam fchnell.

Venus

E6^r

1.

Venus ließ bald werden
 Auß feim Blut als sie lange zeit getrawret/
 Vnd Ate hefftig auff sie hat gelauret/
 Ein Blum auß der Erden.

2.

Ach schawt die Nachtigall
 Wie sie so trawrig thut im Wald vmbfliegen
 Das trawrig spectackel thut jr gfang biegen
 Das sie gibt keinen hall.

3.

Ach schawt die Turteltaub
 Der trawrig anblick hat sie auch verwirret/
 Horcht wie sie auff dem dürrē Aft dort kirret/
 Sie fleucht das grüne Laub.

1.

Hat kein/ kein Seyden thuch?
 Ey wifch mein Schwelter difen rotē Munde
 Vnd macht euch mit einander auff zur ftunde
 Das man das Echo such

2.

Jch gib ein andern Raht/
 Der Jäger wird gewiß nit lang außbleiben/
 Möcht vns mit feinen hunden hie vertreiben
 Vnd ift ohn das schon spat.

3.

Mach sich jede gefaft/
 Von bleichem Ephew laft vns machē krantzē
 Damit von hellen blumen gar nichts glentze
 Hie hengt ein dürrer naft.

Wann

E6^v

1.

Wann wir nun hie fcheyden/
 So wollen wir sie mit dem Laub bedecken
 Darmit die wilden Fauni sie nit bflecken
 Wann sie zu nacht weyden.

2.

Luna wird auch forgen
 Sobald die Satyri im Wald vmbfpringen
 Vnd zu Marfiæ heuffig werden tringen
 Biß gar an den morgen.

3.

Habt jhr die Krantz gemacht?
 Werfft hin/ vnd thut sie alle beyde küffen
 Deß mitleidens haben wir vns befliffen/
 Zu taufent guter Nacht.

Mufica.

 Argument oder inhalt deß
 fünfften Actus.

WAs das fey für ein kläglich spiel/
 Secht jhr samptlich an difem ziel/
 Jetzt folgt weiter der letfte Act
 Da dann ferner wird angefagt
 Wie diese 3wo Perfonen beyd
 Gefunden worden mit groffem leyd:
 Dann als der Jäger jagen wolt
 Dem König Wildprät bringen folt/
 Fand er sie beyde in dem Wald
 Todt/ vnd verwundet gleicher gftalt/

Wuft

E7^r

Wufts nit wie das zugangen sey
 Wurden samptlich zu raht dabey/
 Das sie diefe gar groffe fach
 Daheim eröffnen allgemach/
 Welchs jhnen allen in gemein
 Gefchnitten tieff ins Hertz hineyn/
 Darauff werden sie beyde auch
 Nach Heydnifch fitten vnd gebrauch
 Verbrent/ vnd alfo endet fich
 Diefe Tragedi trawriglich.

Actus v. Scena j.

Thyraus.

AVff/ auff jhr Jäger allefandt
 Laufft/ laufft/ bekandt vnd vn bekandt/
 Auß befelch Nini deß Königes
 Sol ich euch allberichten deß/
 Nach dem morgen auß fremb dem Land
 Viel Volck wird kommen jhm zuhand
 Das er alsdann in feinem Hauß
 Ein ftattlich Malzeit vberauß/
 Wirt halten/ fo foll ich alsdann
 Nemmen zu mir hie etlich Mann:
 Vnd mich verfügen alfo bald
 Hinauß mit jhn wol in den Wald/
 Alda das Wild zu jagen frey
 Von Schweinen/ Hirschchen/ mancherley/
 Darumb fo macht euch bald gerußt
 Dann fürwar groffe zeit da ift/
 Geht hin vnd holt hieher die Hund
 Vnd thut es auch den Bawren kundt/

Das

E7^v

Das jeder hab fein Spieß bey sich
 Vnd brauche sich gar ritterlich/
 So ziehet hin kompt wider bald
 Darmit wir kommen in den Wald.

Actus v. Scena ij.

Diana.

HEut muß ich auch ein hülffe thun
 Wie man mich angeruffen schon/
 Groß frewd vnd luft kan ich ja machen
 In aller zier vnd frewden fachen/
 Deß Jagens ich ein Göttin bin
 Jns Feld/ Berg vnd Thal fteht mein Sinn:
 Manch groffer Herr begeret mein
 Zur kurtzweil vnd zum nutzen fein/
 Auch foll ich helffen heut zur fach/
 Darzu ich mich gefaßt nun mach/
 Aber das sage ich fürwar
 So wird jnen mißlingen gar/
 Heut dielen tag mit jrem Jagen
 Dann es sich etwas zu wird tragen:
 Das wird sie bringen in groß Leyd
 Für jhre groffe Jagens frewd/
 Dann man wird finden zu der frift
 Ein Wild das schon erleget ift/
 Darab man sich wird wundern fehr
 Wie folchs zugeh vnd gſchehen wer/
 Doch wird man folches erfahren frey
 Mit ſchrecken/ jamer auch darbey.
 Nun will ich gehen gleich hinauß
 Der Jäger mein zu warten drauß.

Actus

E8^r

Actus v. Scena iij.

Thyraus/ Syrus/ Jäger.

JHr wiffet nun vorhin beſcheid

Warumb jhr her beruffen feit:

Nemlich das jeder ritterlich

Noch diefen tag woll brauchen fich/

Mit hagen/ jagen mancherley

Wie vns das glück wird zeigen frey:

Nun theilet die Hund vnder euch

Das jeder habe gleich vnd gleich

Biß man kompt in den Wald hina[u]ß

Vnd fie nit etwan reiffen auß.

Syrus.

Wir wollen vns gar Mannlich halten

Die Götter vnd das Glück lan walten

Thyraus.

Nun ziehet fort es ift groß zeit/

Dann wir auch noch zu gehen weit.

Wir wöllen es hie fahen an

Jetzt folt jhr vmb den Wald da ftahn:

Fürwar auch haben gute acht

Ein jeder feinen Eyd betracht:

Vnd wo ich einen finden werd

Ligen vnd ſchlaffen auff der Erd

So will ich jhm/ wie ich thu fagen

Den Schweinſpieß vmb die Lenden ſchlagē/

Darnach dem König zeigen an/

Syrus.

Ey wir wollen gar wol b eftahn.

Thyraus.

E8^v

Thyraus.

Gebt mir die Hund ich wil hineyn
 Sehen was in dem Wald thut fein/
 Geht jhr hin vnd vmbftelt den Wald
 Jhr werdet etwas mercken bald.
 Sa/ fa / vido / vido/ ho/ do
 Vido/ vido/ wo ligts/ vido.
 Habt acht ho lieber Weydman
 Jch fih den Edlen Hirfchen dort gan/
 Vido/ vido/ fa/ fa/ vido
 Fall an/ fall a / vido/ vido.

O was fih ich ligen aldo
 In blut vnd fchweiß verfenckt alfo?
 Fürwar dieses ift Pyramus
 Ach wer hat ihn ertödt herauß?
 O Jamer dieses Thysbe ift
 Deß Königs Tochter ohne lift/
 Laufft/ laufft jhr Jäger allgemein
 Laufft/ laft jetzt ewer jagen fein.

Syrus.

Was ifts? hat euch ein Schwein gefchlagen?
 Was vbels hat fih zu getragen?

Thyraus.

Ach fecht jhr nit das groffe Leyd
 Hie vor euch ligen allbereit?
 Thysbe vnd Pyramus fürwar
 Ligen hie todt ermôrdet gar/
 Sein Pferd fteht hie gebunden an
 Wüft man wer folchs hett gethan/
 Wie mag doch das zugangen fein
 Jhr allerliebften Brüder mein/

Wer

F1^r

Wer wil von den trawrigen dingen
Dem K nig nun die Bottfchafft bringen?

Syrus.

Solchs fteht euch billich zu allein
Dieweil fie von euch funden fein.

Thyraus.

Thysbe hat noch das Schwert im Leib
O de  fch nen holdfeligen Weib/
Jch kans nit bringen in Kopff mein
Wie diefes m g zugangen fein.
Dann wanns ein andrer het gethan
Hett er das Schwert nit ftecken lan/
Vnd het das Pferd hinweg geritten
Nun bleibet aber folchs vermitten/
Dem fey nun allem wie jhm woll
Jch wei  nit wie mans machen foll/
Ob wir fie follen tragen heim
Odr vor anzeigen in geheim?

Syrus.

Wir wollen fie nur gleich heim tragen
Vnd dem K nig all ding anlagen/
Wollen fie legen auff die Erd
Bi  der K nig gefordert werd/
Ein Thuch auch auff fie beyde decken
Sie m chten fonft darob erfchrecken/
Dem K nig vnd der K nigin
Soll mans fein allgemach in Sinn
Bringen/ vnd wann fie horchen drauff
Mu  man das Thuch bald decken auff/
So werden fie/ fie beyde fehn/
Erdencken wie es fey gefchehn.

F

F1^v

Thyraus.

So helfft einander also bald
Sie tragen heim auß diefem Wald/
Vnd wil ich reiten heim das Pferd
Darmit es nit verlohren werd/
Fein heimlich legt fie auff ein ohr
Sagt niemand dauon eynig wort:
Mit einem Thuch bedeckt fie beyd
Biß das der Kûnig weiß befcheid.
Syre bleib du nur dabey ftehn
Das niemand thu darûber gehn/
So wil ich folches bringen für
Was in dem Wald begegnet mir/
Nun gehet hin verforgt es fein
Biß ich komb zum Kônig hineyn.
O der trawrigen Bottſchafft mein
Die ich dem Kônig bring hineyn/
Jch wolt es wer ſchon außgericht
Dann es mich warlich hoch anficht/
Jetzt folt ich lieffern Hirſch vnd Schwein
Die von vns folten gfangen fein/
Aber den Göttern fey es klagt
Das heißt feltzam das Wild gejagt.
Es ift ein gar wunderlich Wild/
Welches vns das Hertz gnugfam erfüllt:
Wie wird jhr Kôniglich Mayestat
Erfchrecken doch ab folcher That/
Deßgleichen auch jhr Ehegemahl
Entfetzen ſich ob folchem fall/
Vorab wann ich auff decken werd
Die zwo Perſonen auff der Erd/
Jch meint er folt jetzt gehn herauß

Mit

F2^r

Mit feim Gemahl her auß dem Hauß
 Dann es ift eben jetzt fei zeit/
 Sihe/ fie kommen allbereit/
 O wie will ichs doch fangen an
 Vor angft ich fchier nit reden kan.

Actus v. Scena iiij.

Ninus/ Semiramis/ Thyraus/ Rofina/
 Florentinus/ Befchluß.

NVn wil ich hie gewärtig fein
 An diefem orth der Jäger mein/
 Dieweil ich fie heut außgefandt
 Zu jagen Wildprät aller hand/
 Darmit ich könn verehren wol
 Das Volck fo zu mir kommen fol.

Semiramis.

Jch möchts fürwar auch leiden gern
 Das man diefe gar frembde Herrn
 Verehren könt/ wie man fonft fol
 Zwar Wildprät kâm dar zu gar wol/
 Thyraus ift vorhanden fchon
 Mich dunckt er wöll zu vns her gon.

Ninus.

Woher Thyrae? war bringftu
 Vns für gar gute Bottfchafft zu?
 Hats etwas geben in dem Wald
 Dieweil jhr wider kommen bald?

Thyraus.

Jhr Kônigliche Mayeftat
 Heut früh vns außgefendet hat
 Zu jagen in dem Wald dort drauß

F2^v

Derhalben wir find gangen auß
 Mit gantzem fleiß wol außgefpuert
 Wie es den Jägern fein gebürt:
 Aber kein Wild wurden wir innen
 Wiewol es fonften viel hat drinnen/
 Allein wir han Joui feys klagt
 Ein feltzam Wildprät auffgejagt.

Ninus.

Wie fo? was ift euch widerfahrn/
 Sags frey herauß thu dich nit fparn.

Semiramis.

Jft jrgent einer gfallen fehr?

Thyeraus.

Ja freylich es ift anders mehr.
 Wo ewer Königlich Mayestet
 Nit wil zürnen ab folcher red/
 Auch fich nit will entfetzen drab
 Was ich allhie zu reden hab/
 So will ich folchs eröffnen frey
 Vnd melden hie ohn allen fchew.
 Aber ich wolt jhr wüftens fchon
 Es will mir tieff zu hertzen gohn
 Wann Thysbe auch nur wer vorhanden/

Semiramis.

Sie ift zwar noch nit auffgefanden.

Wie mir Rofina hat gefagt
 Hat fie fich heut ein wenig klagt.

Thyeraus.

So hört wie wir heut giengen auß
 Zu jagen in dem Waid dort drauß/
 So ftelten wir all fachen an
 Wie es deß Jagens brauch will han/

Vmb

F3^r

Vmbfalten wol denfelben Wald
 Darmit nichts könn außreiffen bald
 Jch nam die Hund vnd gieng hineyn
 Fieng alfo an das Jagen mein/
 Als es gewähret hett ein weil
 Verlohr mein Hund in fchneller eyl
 Vnd hört fie kläglich heulen all
 Das es im Wald hat gmacht ein fchall:
 Da hat ich mich entfetzt gar fehr
 Hab nit gewuft was diefes wer/
 Jch gieng herumb vnd fucht mit fleiß
 Was diß wer fur ein feltzam weiß/
 Da fah ich mein Hund allfant
 Vber ein hauffen ftehn zuhand/
 Hab zwar vermeint fie haben do
 Ein Hirfch vnd Schwein zerriffen fo/
 Als ich anfach was wild es fey
 Ward mir allda gefchwunden frey.
 Dann ich fah auff der Erden ligen
 Jm Blut verfenckt fo gar verfchwigen
 Ein Jüngling vnd ein Jungfraw gut
 Befudelt gar in ihrem Blut.
 Ninus.
 Ja wol/ wer mögen diefe fein
 Haftus nit war genommen fein?
 Thyraus.
 Ja ich kenn fie nur gar zu wol
 Weil jhr wolt das ichs fagen fol
 So muß es fein/ o wußt ihrs fchon/
 Semiramis.
 Sag her es wird dir nichts gethon.

F3^v

Thyraus.

Jch sach erwürgt in jhrem Blut
Den Pyramum vnd Thysbe gut
Semiramis.

Was sagstu da? Thysbe ift doch
Daheim in jhrer Kammer noch.

Ninus. |

So ift auch Pyramus erft heut
Gewefen noch bey der Malzeit/
Wo ift Rofina frag fie du
Was Thysbe droben machen thu.

Rofina.

Sie hat mich von jhr heiffen gohn
Auch die Kammer bald zugethon/
Darneben angezeigt mir/
Wann ich werde gefragt von jhr/
Soll ich fagen fie fey allein
Jr ihrem Gmach vnd ruhe fein.

Thyraus.

O wer die fach alfo befchaffen
Sie leg in jhrer Kammer fchlaffen/
Darmit man aber nit lang fuch
Secht was ligt vnder diefem Thuch.

Ninus.

O weh. Semiramis. O Hertzlein.

Thyraus.

Ach laufft/ ergreiff den König gſchwind.

Semiramis.

Ach/ o du mein hertz liebtes Kind.

Ninus.

O foll ich aber graver Mann
Diß an meim Kind erlebet han

Das

F4^r

Das sey doch allen Göttern klagt
 Wie ift mir jetzt mein Hertz geplagt/
 Ach du Hertzliebес Ehegemahl
 Wie ift zugangen folcher fahl?
 O du Thyrae was machftu
 Was bringft für trawrig Bottschafft zu?

Thyraus.

Es ift mir selber leyd von Hertzen
 Vnd macht mir nit nur wenig schmerzen/
 Noch eins fo muß ich zeigen an
 Was ich noch mehr gefunden han
 Nemlich das Schwert/ welches fürwar
 Noch stecken in der Thysbe gar/
 Vnd Pyramus lag neben jhr
 Vnd hat sie in den Armen schier.

Semiramis.

Ach ich hab folchs vor diefer zeit
 Gemercket an jhn allen beyd:
 Das sie einander fahen gern
 Vnd gaben ach tung nah vnd fern:
 Dis ift gewiß als auß Lieb gefchehn
 Nit weiß ich wie es zu that gehn/
 Was in zu handen gangen sey
 Es kompt nit her von Mórderey

Thyraus.

Es ift fürwar ein schrecklich ding
 Bin darab erschrocken nit gering/
 Ein arm spectackel wars zu fehn
 Das eim die Augen vbergehn.

Florentinus.

O Mein Thyrae wie gehts doch
 Hett ich mein lieben Gfellen noch:

F4^v

All fachen hab ich jhm vertrawt
Das fein hat er auff mich gebawt.

Semiramis.

Ach mein Hertzliebes Ehegemahl
Seit doch getröft in diefem fahl:
Fürwar es wird mir armen Weib
Das Hertz zergehn in meinem Leib.

Florentinus.

Ach du Hertzlieber Bruder mein
O Pyrame was foll das fein/
Das du fo in deinem Blut verderbt
Hie ligt/ dein Angficht gar entferbt/
Soll ich den Jamer fehn vor mir
Das hab ich nit vermeint an dir.

Ninus.

Das weiß ich an mir allbereit
Das ich werd fterben gar vor leyd.

Florentinus.

Wer ich nur noch ein mal bey dir
Nichts höhers wolt ich wünfchen mir/
Aber das kan nit mehr gefein
O du Hertzlieber Bruder mein.

Thyraus.

Nun wollen wir auch auff diß mal
Diß trawrig ding gantz vberal
Enden So denckt nun lieben Leut
Der Thysbes jetzt vnd allezeit.
Was weiter wird zuthun hierinn
Das wird vollent gehandelt drinn

Mufica.

Befchluß.

F5^r

Befchluß.

DJe Action ift nun vollendt
Diß trawrig Werck das hat ein end.
Darbey fo habt jhr all gefehn
Was auß der Liebe thut entftehn.
Wiewol diefe Tragedia/
Soll fein kein gwiß Hiftoria/
Jedoch fo kan man nemmen ab
Das fie auch etlich Lehren hab.
Ertlich man hierinn fehen thut
Wie Pyramus vnd Thysbe gut/
Gegen einander wunderlich
In Lieb entzündt waren heimlich/
Ohn wiffen jhrer Eltern beyd
Stifften fie an ein groffes Leyd.
Solches gefchicht noch heut zu tag
Vnd ift gar ein gemeine klag/
Das viel jrem gutduncken nach
Anfahen folche fchwere fach/
Verprechen fich auß frechem muht
Ehelich/ thut aber felten gut/
Verachten jrer Eltern Raht
Erfahrens hernach mit der That/
Das fie/ wann folchs gefchehen fchon
Jhnen den grôften fchaden gthon/
Nichts defto wenig er wird bereit
Den Eltern ein groß Hertzneyd
Empfinden groß kûmmern darab
Bringen fie vor der zeit ins Grab
Dieses die Jugend merck in gemein
Dann Gott wird ein mal Richter fein

F5^v

Darnach sicht man die Thorheit groß
 Deß Königs vber alle moß/
 Das er/ nach dem der Traum jhn krenckt
 Durch Menfchen folchs erfahrn gedenckt:
 Befchickt die Warfager allfant
 So sich halten in manchem Land/
 Also find man der Chriften viel
 Bey vns vnd auch an diefem ziel
 Die haben viel mehr zuuerficht
 Auff gottlofer Menfchen bericht/
 Dann auff Gottes hülf vnd genad
 Die er doch weifet früh vnd fpät
 Solche Leut bringen nichts daruon
 Dann nur endlich deß Teuffels lohn/
 Kommen in ein viel größern fehl
 Nemmen fchaden an Leib vnd Seel
 Befchließlich fehen wir mit fleiß
 Auß diefer fchönen Tageweiß/
 Wie folch vnordentliche Lieb/
 Hat für ein ftarck mächtigen trieb/
 Wo fie einnimpt ein junges Hert3
 Mit bitter angft/ lehnenden fchmert3/
 Darinn fie also hefftig wüt
 Verkehrt Hert3/ Sinn Vernüfft/ Gemüht/
 Wird leichtfertig verfhlagen gant3
 Schlecht Seel/ Leib/ Gut/ Ehr/ in die fchant3
 Acht fürbaß weder Sitt noch Tugendt
 Es treff an Alter oder Jugendt/
 Wer fich in folche Liebe beut
 Welche ift voll trübfeligkeit
 Diogenes nent fie argwohnig
 Lieb fey ein füß vergiftet Honig/

Petrar≠

F6^r

Petrarcha thut die Liebe preifen
Sondern nennt sie gulden Fußeyfen/
Ein kurtzt frewd vnd langen schmert3
Darmit gepeinigt wird das Hertz/
Hiemit so woll gewarnet sein
Sonderlich die Jugendt in gemein/
Vnd spart die Lieb biß in die Ehe/
Dann hab eins lieb vnd keins meh/
Die selb lieb ist mit Gott vnd Ehren
Darzu wird Gott selbs glück becheren
Hiemit sagen wir euch danck
Das jhr vns auffgehorcht so lang/
Vnd bitten auch darneben euch
Wo etwas nit zugangen gleich.
So wolt jhr nemmen doch für gut
Auß rechtem vnd freundlichem muht/
Gott wöll euch bhüten allefant
Mit feiner allmächtigen Hand/
Woll euch segnen Leib vnd Seel/
Das wünccht euch Samuel Jfrael.

ENDE.

F6^v

Ad Authorem.

WAnn einer in ein Gart ſpatziert
Vnd ſicht manch Blümlin wol formiert
So bricht er drunder ab gar bald
Welchs jhm am aller beſten gfalt
Die übrigen die lafter ftehn
Biß das die ſchönſten thun vergehn.
Darnach fo nimpt er weiter an
Was er zuuor hat laſſen ftahn.
Alfo Herr Samuel jhr auch
Fein obferuiert dieſen brauch
Die ſchönſt Blum im Ouidio
Gewiß jhr abgebrochen do/
Welch vnder andern lieblich reucht
Das hertz vnd gmüht gar an ſich zeucht
Wanns recht verftehen will die Jugend/
Wird ſie gewiefen zu der Tugend
Ob ſchon der Buchſtab eufferlich
Viel anderft laßt anſehen ſich
Thut eins ſpatziert noch weiter hin
Jn dieſe Metamorphofin
Vnd brechet folcher Blümlein mehr/
Wer klug iſt/ deuts euch für ein Ehr.
Laßt euch die Arbeit nit verdrieffen
Mit anmahnen thu ichs beſchlieffen.

Job Dauid Schneyder zu Mün-
ſter in S. Gregorij Thal.

F7^r

Gleich wie die Binen sich bemühen/
Im Sommer wann die Rößlein blühen/
All Blümlin schön herfür thun blicken
Dauon dann sich auch thun erquicken
Die Binen gut/ vnd sitzen drauff
Gar dick vnd viel mit großem hauff
Saugen drauß der Blumen krafft
Machens zu einem süßen safft
Welchen man dann zu nutz kan machen
In der Artzney/ vnd sonst zu sachen:
Eben also/ vnd gleicher gftalt
Habt jhr Herr Samuel alsbaldt
Auß dem Ouidio gezogen/
Diß schön gedicht/ auch drauß gefogen
Ein rechten süßen Honigseim
Der wol wårth ist zu tragen heim/
Dann wann diß Werck recht wurd betracht/
So ifts zur guten Lehr gemacht/
Der wilden Jugend/ die sich kan
Darinn erspieglen/ vnd als dann
Von der vnordenlichen Lieb
Abstehn/ damit man nit betrüb
Die Eltern fromb/ sondern deft mehr
Die selbigen hinfüro ehr

Sonsten thu ich mich wol befinden/
Das gleicher gftalten auch die Spinnen

Auff

F7^v

Auff folche schöne Blümlein kriechen
(Die nichts deftminder lieblich riechen)
Saugen drauß jhr Venen vnd Gifft
Damit man dann viel böses stiftt.
Also thut man dern Leut auch finden/
Die nichts dann dLeuth außrichten künden.
Veracht mancher eim fein gedicht
Da ers doch selbst könt machen nicht
Wolan/ laßt euch folchs nit betrüben
Sondern thut euch noch ferner üben/
In dergleichen schönen Gedichten
Darmit werd jhr viel guts außrichten
Auch bey den verftendigen Leuten
Wird mans euch für ein Ehre deuten
Drumb ich euch hie ermahn zum bſchluß
Bitten darab han kein verdruß.

Johannes Ochs von
Colmar.